

求恕齋
叢書

雪橋詩話

雪橋詩話

餘杭褚德彞署

雪桥诗话

二函
十二册

出版：文物出版社

北京五四大街29号

印装：韩营装订厂

北京大兴县

发行：新华书店北京发行所

一九八四年十月木板刷印

定价：九十二元

统一书号：17068·1260

雪橋詩話序

國朝文人經學史學均超出明人之上獨至一朝掌故之學不如明人遠甚鄭端簡王弇州固無其人卽紀載彙編之書金聲玉振之集國朝亦無有也史館之實錄逐日排比論旨無首尾無斷制不附大臣列傳與宋明實錄不同起居注亦同更不完備大臣列傳內官至侍郎外官至巡撫無不立傳傳亦錄論旨節奏疏一篇詳履歷耳其人之學行功業無所表見也三品以下則無傳十四傳不全十志亦不備史館如此尙何所望私家著述最爲翔實者止錢衍石之碑傳集王文勤之石

渠餘記吳制府之養吉齋叢錄而已楊芷姓太守同寓
上海一日以雪橋詩話十二卷見示自首訖尾讀十日
而畢曰此雖名詩話固國朝之掌故書也由采詩而
及事實由事實而詳制度詳典禮略於名大家詳於山
林隱逸尤詳於滿洲直與劉京叔之歸潛志元遺山之
中州集相埒卽其論詩推重國初之朱王葉沈悉取正
聲而不甚揚袁蔣趙之流波郢說歧塗埽除淨盡於詩
學亦甚有裨益芷姓生長世家熟諳故事前與意園同
輯八旗文經詩話之作與文經同意園本意廣收國
朝王公大人碑版意欲勒成一書而不成與志文貞請

續修八旗通志而不果同一恨事

荃孫

前輯續碑傳集

亦以滿洲人碑傳少爲恨承乏史館前後十年大庫之
零編舊冊摺包旗檔觸目皆有用之書如能細心搜采
不必盡恃實錄列傳也前序意園文集以信陵密國擬
意園今又以京叔遺山擬君千古傷心人當相喻於意
言之表也已甲寅莫春江陰繆荃孫序

雪橋詩話序

聖遺居士避世於北江之尾陋巷湫塵蓬藿拄徑十笏之室圭竇徹明時在嚴冬冰雪在地北風振葉踵其戶者若窺袁夏甫之室御王孝尼之車陟匡君之廬而見靈均之澤也居士有書數萬卷臺城之警十存三四然皆金匱石室之藏功宗篤弼魁儒碩師之述作累朝文獻之寄昔在承明所哀鳩以成文經者環堵五版積軸若山居士槃薄其間以永曠晝偶乘鹿車出過知好靜對移晷容寂而思深諮無不塞歸卽披卷冥搜鉤章索句掌錄迄寫細書精敏日可萬字曾不逾歲積冊十二

署之曰雪橋詩話匪獨言詩而已其於聖賢羣輔諄誨
師儒裘帶都人英賢姓氏莫繫本牒徵事解題昭然若
親見之若並游盛世而聞其警欬昔我有先正其言明
且清小雅之材七十二大雅之材三十六春秋說題辭
曰詩之爲言志也天文之精星辰之度人心之操也在
事爲詩未發爲謀恬憺爲心思慮爲志稱其詩以論其
事稽其謀度其心慮人倫之紀春秋之事不在茲乎余
嘗語聖遺韓太傅以儒行說詩義蓋比於公穀之說經
劉中壘以固實說詩事蓋比於左氏之作傳王者攷正
之觀降而爲師儒絃歌之業鄒魯之士有恫心焉說之

愈益詳誦之愈益貫興觀羣怨憲章文武周歷八百年而周之詩教乃橫被於百世尙書曰自一話一言我則未惟成德之彥古語通用言今語通用語於籀文語字作諳其解曰會合善言也知語之爲會合善言則知七十子之所傳六藝詩家之所錄曰故者爲樂先日傳者爲示後曰說者爲述教曰訓者爲順攷曰記者爲正識凡皆以永我先王先民之言達於事變而懷其舊俗竹帛之稱古今則殊神明之感古今一也居士蹙然有聞齿然而應曰其然他日索序卽書以貽之太歲在昭陽赤奮若孟冬之月李鄉寐叟沈曾植

雪橋詩話序

詩話之作於宋最盛其風旣扇條流彌繁或品藻古今
或掎摭利病或旁稽軼事或偏照方隅或宏綜乎一朝
或導源於四始尋其意製相規大氏皆準仲偉而精識
遠不逮矣若乃東觀纂書始聞斷代南村讀史隱寓孤
懷憲宣尼之尊周體仲任之頌漢凜此箕頽之節抒其
忠孝之忱越世高談自闢戶牖吁其少哉吾友楊君聖
遺久滯史職外更三州自公之隙則惟夙好是敦良書
獨擁蓋知閱水成世所病無名藏山立言乃傳不朽非
夫棲情皇路榮齒通堦者也海內多故金陵瓦解君嚴

駕而行棄官從好於是文通之志唯樂一邱安世之書
竟亡三篋而平生撰著亦復雲委霧散等諸玄珠之喪
非喫詬所得而求矣自頃寢跡海濱寂寞人外孟堅懷
其遺美靈均鬱其離憂大春善談則自標清節陽秋別
錄則多識前言成詩話十二卷題之曰雪橋者所以抱
彼黍之慟致維桑之恭焉昔者元裕雜志築野史之亭
表聖工評居王官之谷君其若人儔乎去歲夏余獲與
君交欽其性行高峻問學淵深喜鄰下之同游索帳中
之祕翫忻然授簡猥命校讐二復卒讀以爲商榷羣篇
整齊故事記侯謹之皇德儼苟悅之編年亦幾直抉文

心奮雕龍之筆方軌實錄具司馬之才矣然則君之感
物造崙屬辭比事子容持其介性蒙莊託諸寓言不廢
主客之圖特嚴君臣之義豈非淵明所云常著文章以
自娛頗示己志者乎用挈閎綱敬諭來哲毋與聖俞金
鍼醕甫玉屑比量而齊觀也甲寅閏五月隘堪居士孫
德謙

雪橋詩話序

留垞先生避地之二年成雪橋詩話十有二卷承幹爲之校刊甲寅九月工既竣爰泚筆而爲之序曰是書之作蓋卜子夏所謂達於事變而懷其舊俗者也先生舊家遼河以東自天聰二年隸籍尼堪居京師者九葉食德服疇幾三百載家世之所傳聞師友之所講論自古在昔先民有作居史職十年素性狷介當官應事之外不利走趨日惟故書雅記之是好輶軒之使不一預陽城馬周之科不記名故端居之日獨多宜其網羅放失著作斐然顧服膺大興朱學士翰林以讀書爲職業之

言委懷研覽自謂學問淺薄不敢天闕紉素己亥乞外
轉徙江湖閒於時世變益亟所見所聞益日異浮湛周
星非爲軍府典章奏卽領一郡斤斤以簿書期會自效
復不暇有所述造徘徊審慎迄於今茲而先生遂垂垂
老矣政教旣失不糾言妖記事之書如談異域昔者西
河序詩謂四始爲王道興喪之所由生平今日由變風
變雅國異政家殊俗之後而上溯夫 列祖 列宗厚
人倫美教化以其成功告於神明之盛軌固有芒乎其
不及知知矣而不能言言矣而不能信者豈不痛哉先
生是書紀舊聞發潛德具文見意其說詩以質厚爲宗

其述事以有依據爲斷自以多識前言往行於懷舊之
蓄念爲加詳焉後之覽者其亦有遇塵霧而振霜雪之
思乎吳興劉承幹謹序於歇浦之嘉業堂

雪橋詩話卷第一

求恕齋叢書

遼陽楊鍾義撰集

吳興劉承幹參校

宛平韓畱字經正號石耕父某布衣有行誼與無錫高忠憲善攜其二子來南中因家焉善鼓琴尤工五言詩四十不娶徧游吳越閒以終初畱之來南天下猶無事旣遭喪亂乃敘次其流寓之由爲詩一篇幾數萬言兒時在金陵與守陵內官相識從觀陵祭及見弓劍之陳俎豆之設與夫灌壇寢殿規制曲折悉見於詩有天樵子集其望天台詩云望裏天台近羣峰秀幾重回看青

嶂斷忽有白雲封絕壁垂樵徑春泥陷虎蹤石橋今夜
月應爲照長松送友之晉州云策馬不辭勞看君氣自
豪秋風雷澤迴寒色太行高黃葉當關路清霜脆布袍
遙知初到郡應解醉葡萄兄耕良名田善畫

申臯盟節愍公佳允長子少喜爲詩十五歲補邑諸生
以父殉難絕意仕進嘗曰靜坐自無妄爲讀書卽是立
品跋少陵徐卿二子歌曰此等詩雖老杜亦不能佳蓋
以牽率應酬非所以抒寫性靈耳所著詩曰聰山集其
遣興云豈敢名高尚山園已定居數椽風雨外萬事死
生餘避地尋丹訣傳家有素書天寒松酒熟日日溷樵

漁雨後林慮道中早行云曉渡香泥坂秋花亂馬蹏不
知山寺近漸覺遠村低萬事驚鞀鼓孤雲入杖藜蘇門
高臥處爲訪碧峰西劉雲麓避亂來居郡中云空階新
雨鹿苔青有客攜棋伴草亭同屬壯年吾較老共居斯
世汝初經不緣兵火寧移權反以憂虞得聚星卷帙長
吟消白日莫悲搖落負山靈黃花谷云竹杖尋源入上
方滿山榭葉晚蒼蒼亂碑零落游人少一道飛泉下夕
陽宿靈巖寺云游屐初從泰岳還石林斜日草堂閒上
方鐘定無飛鳥一片秋聲葉滿山汎舟明湖云女牆倒
影下寒空樹杪飛橋挂遠虹歷下人家十萬戶秋來都

在雁聲中寄冀襄陽公治云河朔音書隔楚煙十年無
淚拜啼鵑仲宣樓上休南望細雨蒼梧亦可憐汪鈍翁
謂和孟五七言詩氣體俱極高老子尤愛其七言絕句
暇日與王六諷詠數首歎其含蓄淒澹使置諸唐人集
中未知可與誰比亭林雨中送申公子涵光詩十載相
逢汾一曲新詩歷落鳴寒玉懸甕山前百道泉臺駘祠
下千章木有荆園小語田綸霞司農嘗從學詩卒年五
十九

鳧盟詩解后南游忽二年怪來鬢髮老河邊故人零落
行將盡與子重逢亦偶然爲殷岳伯巖棄官北歸作也

岳一字宗山雞澤人官睢寧知縣鳧盟遺書勸之歸慨
然曰我豈以一官易我友遂以朝衣予學官投劾歸國
變與弟淵隱於西山所居鄉曰小砦有留耕草堂集一
卷鳧盟序之

永年張蓋覆輿一字命士與鳧盟伯巖稱畿南三才子
嘗贈申絕句草澤賢豪盡上書奎章閣外卽公車我甘
漁父因衰老獨有涵光是隱居鑿坏以居不與外人接
久之發狂死申爲作傳刻其遺詩二卷招同殷伯巖白
函三郝元直苑西柳霍亮雅申鳧盟劉資深集飲云屢
宿陶潛宅今來得數公竹斜燈影外人醉雨聲中老惜

歡娛短交緣出處同病軀先就榻應恕鹿皮翁漫作云
玉盤浸墨可二斗高麗繭紙冰蠶紋醉來揮灑興不盡
欲上青天寫白雲後湖中樂云桃花落盡柳花初重作
蓮舟水上居已敕行廚烹野雁更催漁戶打官魚盧工
部說楚中山水云說峽山垂座談湖水在襟谿村卽事
云野花開閒色秋鳥落寒聲

故吏部姜如須垓號仁石山人忠肅公瀉里之子如農
給事塚之弟官行人時廨舍題名碑有阮大鍼名疏請
重立石思陵允之鏟去大鍼姓名萊陽破忠肅殉難一
門死者二十餘人鼎革後避地吳門卒葬西山之竺塢

徐昭法五君子哀詩云吾友神皇裔海岱聿挺生風騷
緬哀怨感激空生平憶昔年弱冠賢書冠王庭先公分
禮闈清鑒持文衡圭璋自特達遇合洵有神射策漢闕
下一出凌羣英終軍正年妙衛玠復神清綵衣縮紫綬
翩翩馳帝京妙年奮直節慷慨輸忠貞擊奸穹碑碎粉
署清軒楹攬轡周四方江山助精靈咳唾珠玉落詩歌
金石聲爲國除大憝折檻有難兄若翁仗大義闔門殉
孤城忠孝聚一門泣血動聖明將母避世難日夕從南
征回首望日觀蒼茫隔蓬瀛禹穴討幽意蘇臺懷古情
閒關辭紱冕契闊甘柴荆與余爲弟弟意氣浩縱橫俯

仰死生閒長慟中腸傾有時良讌會酒酣涕淚零涕淚
咽笑語四座懷酸辛余旣終避世君亦長辭榮采薇與
種瓜十年同伶偶胡然鵬鳥入龍蛇歲崢嶸賈生哭泣
死千秋徒令名忠魂返帝鄉彷彿從霓旌中宵望天宇
炯炯增華星二姜流寓於吳其後遂爲吳人如農能畫
有藝圃在閩門子學在築諫草樓以奉遺書曾孫女姜
桂亦善畫王蘭泉題其春耕圖云可是敬亭山下路巖
臣老去事春耕光字中丞晟則其元孫也

徐昭法名枋號侯齋少詹事文靖公汧長子崇禎壬午
舉人乙酉文靖殉節止水欲從死文靖曰吾不可以不

死若長爲農夫以歿世可也是歲避地汾湖已而遷蘆
墟黃石齋於丙戌薦俟齋貽書臥子招之入閩臥子亦
欲俟齋參其軍皆力辭以爲諸公不過因先人之大節
而及藐孤是昔人所云因以爲利者故不敢若安危得
喪非所斤斤也丁亥戊子在金墅癸巳以後往來靈巖
支硎閒己亥居積翠定卜澗上草堂遂老焉澗上居天
平之麓長年禁足賣畫自給蔡毓榮督武昌致名藥書
幣求作畫謝不受曰明府正是殷荊州特吾薄顧長康
不爲耳與蔡幕下馮生鶴仙書云僕自二十四歲長往
避世今已五十一歲矣不敢違先人長爲農夫之一言

親知故舊都謝往還顧敢與公侯卿相通交際耶況當
世之公侯卿相亦安用此衰瘁之廢民乎善爲我辭以
安吾素陳言夏山中遇昭法句云雪滿山中蘇武窖雲
橫江上謝翹臺睢陽撫吳日兩詣之避不得見宋牧仲
有句云造訪旌麾空悵望逃名巖穴愈孱顏巖鐵橋徐
昭法山水冊題詞云風雨高歌有鬼神自將翰墨寫天
眞支硎亦是桃源洞不許尙書一問津康熙甲戌卒年

七十三

邢孟貞高潛人居石臼湖上因以名集李退菴與漁洋
論布衣詩曰終須還他邢昉第一乙酉讀祖心再變紀

漫述五十韻有云白頭老宗伯作事彌狡獪捧獻出英
皇箋記稱再拜蓋指牧齋有故宮燕二首丁亥年作其
一云君不見故宮燕春雨秋風幾回轉宮中風雨長蓬
蒿飛入宮牆繞虛殿穿簾度閣羽差池盡日呢喃人未
知柳綠乍銜干尺絮花開仍拂萬年枝玉階寂寞采恩
冷畫棟差池春燕影歲歲營巢竟不成春來秋去誰曾
省可憐此度秋風早整頓毛衣猶自好裴徊欲別未央
宮萬戶千門忽如掃鐘簾何年去洛陽僊人辭漢淚成
行最苦西飛雙燕子回頭不見舊宮牆其二云烏唬金
井桐唬聲易鳴咽未若向西風傷心故宮燕白門燕子

去秋風社日年年無不同惟有曾棲青瑣闥欲去未去
悲西宮卻憶西宮前度築禁籞句陳俄彷彿不道君王
事臥薪頗聞將作誇神木一月宮前纔列仗翠華西去
塵飄颺虛殿無人燕子來三春對語雕梁上轉眼誰知
事更非雕梁藻井似蓬飛明歲壞垣春草裏茫茫何處
問烏衣沈崑銅故宮詞云三百年恩總未酬宸居何意
臥羈囚先皇製就琉璃瓦還與孤臣作枕頭武英舊殿
月輪西袞袞朝臣待漏齊十九年今無別夢冬青枝上
鷓鴣啼縣邈悵皆足動人望古之思

龔半干崑山布衣隱居清涼山畫坊梅花道人常自寫

小照作掃落葉僧狀因名所居爲掃葉樓別號柴丈嘗
纂詩遇率近體專宗晚唐王西樵爲櫟園題半千畫云
石門積雨黯層巒鷗路蒼蒼萬木攢爲憶秋風吹老屋
孤情著意寫荒寒佟儼若贈半千詩小園留半畝有容
老柴桑

朱長孺鶴齡號松陵散人苦學強記晨夕一編遺落世
事以愚菴自號亂後閉戶著書長於箋疏之學撰有毛
詩通義尙書埤傳禹貢箋注讀左日鈔先注李義山集
錢牧齋見而稱善貽以僧道源所注本令足成之牧齋
自注杜集併以與之令薈萃成書而長孺頗立異同牧

齋不樂遂各自爲書兩行於世錦州席居中允叔贈長
孺詩高隱從知吾道尊一生自許老邱樊由來歲月惟
耽學如此乾坤合閉門蹤跡久同綺里季詩篇絕愛浣
花邨迢遙道里雙魚杳長向江干損夢魂年七十餘卒
松陵爲少伯浮家天隨泛宅之鄉臞菴在松江之濱宋
王汾營此以居柳塘花嶼景物秀野中有釣雪灘三高
祠亦在焉吳江顧茂倫少游於陳大樽之門乙酉棄儒
衣冠嘗慨唐人之詩選者承譌踵謬爲之揚摧論次命
曰唐詩英華人各爲之傳詩矜慎不苟作出必雋永晚
自號雪灘釣叟松陵女子沈關關刺繡作雪灘濯足圖

臨歿令諸子以頭陀斂徐電發爲作雪灘頭陀傳潘力
田松陵文獻云明末吳中詩習多漸染鍾譚有孝與徐
白潘陸俞南史周安顧樵輩一以唐音爲宗選唐詩英
華盛行於時詩體爲之一變其寄贈沈留侯偕小阮北
上詩云春風楊柳拂行舟有美聯翩共遠游入洛陸機
新作賦依劉王粲故多愁舊京珠履三千客荒冢冬青
一十秋湖上好山無恙在獨持卮酒對羣鷗徐白字介
白別號笑菴卜築蘇州之靈巖顏其室曰白髮前朝士
青山半屋雲俞南史山人安期子字羨長一字無殊號
鹿牀其長門怨云金屋春深早閉門平陽歌舞動黃昏

君王那得如明鏡日向妝臺照淚痕江陰張尙書有譽
晚爲僧居靈巖有無殊移居光福同茂倫樵水訪之不
值留贈一首樵水卽顧樵力田稱其志尙冲素於世無
營詩有錢劉風味畫入能品每橐筆游山水圖而詠之
留連忘返過歸雲菴云落日峰頭曳杖還薜蘿深處見
炊煙連雲樵徑青松裏半嶺茅茨紅樹邊疏磬數聲開
竹戶寒泉百道下山田高人遺趾依然在谿路桃花憶
往年周安字安節潘次耕謂其詩辭旨清遠外澹中腴
潘陸字江如其論詩謂鍾譚興而國亡魏楚白謂爲法

家定案云

潘次耕贈錢飲光詩蹠血生還萬里天土牀樹屋尙依然
箋餘易象研朱細踏過雲山著屐便久矣泥塗書亥
字淒其衰白感丁年誰憐靈武麻鞵叟老向空山拜杜
鵲飲光崎嶇閩粵歸老田閒其胡星卿茅屋歌云白鷺
洲接大江濱牧馬兒來動成羣先生避世何處去合家
住近公主墳茅屋三閒倚墳脚門戶欹斜草繩縛籬外
時聞樵婦喧樹下每有漁船泊先生田無一石租餬口
祇賴青囊書星卿精堪輿書春深婦子競鉏菜水落弟兄公養
魚可憐茅屋多年破五柳陰中留客坐風雨淹旬不出
門先生高臥舉家餓先生本是公主孫當年駙馬最承

恩馴象門西起府第至今基址宛然存府基荒去墳園
冷細竹寒花空滿嶺洗象猶傳金水橋灌畦爭汲琉璃
井東川戰功晚始酬駙馬還蒙少主優靖難師來家已
破子孫旋失東川侯奪爵猶加主國號上書乞恩無不
報下降聞在惠帝年問安尙觀英宗詔詔書累朝罌有
光龍牋寶篆枕中藏主家法物一朝盡樸素惟留駙馬
牀駙馬之牀樸如此想見國初俗不侈當時賜出椒房
官如今鎖在茅屋裏茅屋相看幾度春終年抱膝不知
貧叩門本是先朝爵失路時憐帝室親先朝帝室復誰
在茅屋棲遲人勿怪君不見開平王後懷遠侯妻子負

薪身種菜常開平裔某中山壻鼎革後居湖孰種菜自
給人謂之湖孰菜飲光及新安汪於昇均有歌詩牧齋
吾炙集錄飲光及許友之詩爲多

閻古古參史閣部軍事乙酉以還刊章名捕龔芝麓救
之而免嘗於龔座上賦詩有螳螂誤入琴工指鸚鵡虛
傳鼓吏名之句一時名流咸爲之閣筆蜀中雜詩江干
琴史購零星金石敲殘指血腥羅漢松遮花裏路美人
蕉錯雨中櫺縑絲錦戶迎蠶虎過峽賓船祭鼈靈題罷
雪樵行樂卷可憐游宦亦漂零仲冬天氣似花朝巖壑
蒙茸翠未凋半截雲藏峰頂埕兩來船斷雨中橋漁邨

烏柳圍金橘僧閣香柵蔭鐵蕉地接番驪人習苦荒山
紅葉女郎樵二詩頗耐諷詠至若屋上龍交生漢祖澤
中蛇斬應秦皇未免火氣逼人了無意味

紀伯紫送胡彥遠南歸詩記昔乙酉歲斷髮出奔走城
西黃葉邨安禪傍枯柳潭風送早秋山雨墮窗牖零單
兩瘦曾煮茶自相耦趺坐無他言一卷常在手問爲誰
氏詩賞之不容口展帙覺異色竟讀嗟歎久鏗然聲律
高定識精力厚旣道姓名罷行藏更非苟澹比松下禪
堅類柏舟婦一家河渚棲梅花帶左右入林恐不密數
峰當戶守內子亦苦吟研山問杵臼置君神仙中無迺

圖畫醜此語今十年夢魂未嘗負犖犖千秋名淪落同
做帚投刺長安道錯愕辨真否燒燈韓子廬濁醪傾幾
甌平生性命歡獨此堪不朽長歌貽蹇修再歌示良友
環堵生煙雲眞懷動星斗何意超古初祇不落人後春
到理歸鞍故人備糗糗卻恨邢臺台斂我西山偶離合
固難期曰歸勿回首湖上多桃花澗中羸南畝莫帶長
安塵輕點溪頭酒彥遠名介初名士登錢塘諸生國變
後隱於河渚河渚卽西谿萬年少贈詩所謂河渚經營
把釣綸乾坤草莽一閒身也徙宅一畝田順治中嘗游
京師晚逃於禪年未五十而卒有旅堂詩集馮山公爲

之序妻翁少君桓能詩偕隱重過西湖詩云風風雨雨
鳥空啼草綠山腰水滿隄畫閣已傾歌舞散十年重到
六橋西

彥遠感懷云蟋蟀候十月自來親牀帷又云榮名汨民
秉鑿略矜等夷假寐昏旦中冥然已無知又云破劍作
耕刀鐵存而劍亡送顧庶其南還并訊茂倫諸子云離
堂尊酒恨難平久客何堪送客行落日自傷游子意殘
年倍有故鄉情帆檣楚國羣鳥晚橘柚吳天一雁晴歸
訊江城隱君子幾人雨雪憶劉生雨中懷陳四康侯東
歸云楓落吳江客路寒布袍江上思漫漫孤舟一夜風

兼雨人到嚴陵第幾灘其送吳梅邨被徵入都四首久
在人口不錄

紀伯紫號慙叟自稱鍾山遺老有真冷堂詩稿李文定
送其南歸詩南音新捷羽書催好趁征塵結伴回曉翠
依然楊柳路江流無恙鳳皇臺清尊宛轉歌三疊明月
蒼涼賦七哀從此煙波蹤跡渺有誰還爲寄書來

建陽黃澂之字靜宜初名師先字帥先晚易今名一字
波民初以布衣爲史忠正上客忠正殉國以黃冠歸故
鄉其小桃源山居詩云柄鑿方知入世非幽尋勝踐豈
全違琴清夜月留僧宿酒熟春山待客歸自製竹皮籠

短髮新裁荷葉理
初衣平生羞乞陶
奴米橡實寒泉可
療飢小桃源武夷最勝處也其後出游大江南北康熙
丁未郡人葉矯然遇之京口僧寮三伏中爲矯然揮汗
賦五律於便面意氣不少衰後二十年矯然至延令放
生菴見其壁上詩詢主僧云化去五年窮老無子歿於
維揚同人醺金以殯遺民詩感舊集皆以爲福州人長
樂陳惕園爲作黃先生傳

李杲堂鄴嗣原名文胤以字行
藪縣孝廉年十二三卽
能詩里中有鑑湖社仿場屋之例黏名易書以先生爲
主考甲乙樓上少長畢集樓下候之一聯被賞門士臚

傳其人拊掌大喜如加十賚與徐青雷振奇王水功玉
書邱梅仙子章林荔堂時躍徐霜皋鳳垣高廢翁斗權
錢蟄菴光繡高隱學宇泰爲南湖九子緣情綺靡音調
淒涼其五言古詩幽冷刻深尤爲獨造秋懷云南登白
雲山巨壑萬年在老藤緣若梁蒼虬俯承蓋崩剝傍壑
深日渴陷其內我行已及巔得與飛鳥會憶自伏蓬茨
三年漸短喙嚙雪猶未乾蒼茫喪蘭佩豈意躋危岳復
窺天地大延頸始一歌林木助幽籟雲黑古西陵東望
哭再拜朱囑暮歸來迢迢關水外萬古最傷心藺亭夜
半雨六陵失金鐙守此一鋤土亭下孰長號寒食孟中

黍雲嵐幾處同故宮弔隋堵長溪不了愁豈在吾生補
繭足走空山忍飢采榛旅五年八徙家枯魚重入釜愁
來不敢言吞聲餽苦苴六籍方颺灰腐儒等厮虜隙壁
小漏光當塗見門虎欲哭且莫高詩人敬天怒

杲堂嘗有詩云采薇磴磴是爲末節臣靡猶在復興夏
室幅巾方袍游屐常停太白山中爲天童屢世金湯木
陳悟留山曉天岳皆結忘年之契仿遺山中州集例選
甬上耆舊詩凡四百三十人三千餘首胡道南太僕巡
視兩淮鹽政爲之開雕康熙庚申卒年五十九黃梨洲
志其墓謂先生尤長於麗語使當詞頭之任眞足華國

而以廟堂金石爲竹枝禪頌之音豈不可惜其烏石山
後失道云習陂厭平阡歧道入榛莽竿足不肯回牽拂
堅初往稍進益無天竹葉大踰掌隙處觸巒雲日腳不
落壤視體若偃松漸偃安得仰兩袖競翅張冒棘先用
顙導者未識誰後趾蹠前衲人獸盡無音但聞碎籟響
三里幸出叢目光久矐瞬始見樵子行訝我反山魍得
杖云旣出賀險盡瞻前乃復陡小憩對古松支離類此
叟策足恥言疲終落僕夫後山人指爪彊拗竹等拗韭
憐子進一莖茲意感君厚忽若當顛危倚身得奇友山
魍不敢爭空潭戰蚘鰲翼足若漸輕影逐孤雲走大謂

二子云騰嶽等培塿至鄧峰草堂云此亦梵宇耳其名
曰草堂老僧無衲氣處士同行藏半扉辨客履引我坐
藜牀訓客訥言語坐久喜憇憇自云山寺瘠脫粟不滿
瓦鳥鼠念僧貧留果充餼糧舊栽扶老竹新葉藕花塘
左有泉一潭木石養幽香綠煙常不散盥肺汲鴛漿勸
客且坐此消受星氣涼自大嵩嶺上二十里至福泉精
舍云舍舟上樵徑晴眺分纖毫循塗凡屢盤獲奇隨所
遭崩厓露雲根長風勢漸饗諸巒徐束體始識身已高
過雨忽足下髮卜天氣交在輿尙苦疲何況昇者勞首
虐乘人車筋力咩爾曹斗上復稍垂豁然闢林坳老松

得成鱗巖上抽春毛梵僧搆幽棲人龍同一巢入門氣
得蘇豆筍羅山庖到此慙浮名徒爲猿鳥嘲我何不徑
然將家住藤梢吳門懷古云胥臺黯黯下殘陽聞說臺
高春夜長楣景已銷頻曲路屨聲如在小斜廊曾尋故
窟重來燕頗拾前溪舊種香淒斷越城橋上望不堪飄
雨過橫塘郡城秋眺云有客江城共攬衣登臨不盡在
殘暉水從唇口中門入山自峨眉半夜飛千載純鉤餘
劍草一編越絕問漁磯邨東漸聽人聲近知向荒碕采
鮎歸

杜茶村墓在金陵太平門外梅花村守江寧時曾爲脩

葺並種梅桃三百株詩曰變雅堂集其眞州新城賦得
十里桃花留別云倚櫂望遙天明霞漲一川同驚分手
日莫記種桃年紅入江南樹青爲渡口煙無勞更相送
緩緩問歸船登金山塔云極目非無岸滄波接大荒人
煙沙鳥白春色嶺雲黃出世登初地思家傍戰場咄哉
天咫尺消息轉茫茫雨後集含露堂言別云桐栢交陰
徧蕭然雨後秋過從含別緒言笑隔時流古意淮南葉
他鄉劍外州十年對知己今日更淹留其輓嘉禾友人
云君才丁丑盛文章壬午論交在帝鄉一別再期純涕
淚兩登八座亦淒涼隴頭水咽疑人語粵嶠猿啼斷客

腸指點昔年游宦地不知何處不沾裳日日論文意未
宣還從別後寄長箋請纓策黜餘何用諛基金多但可
憐紅板橋頭重握手南倉渡口幾迴船元文罷選關天
意猶感忠言到九泉

公欲刻元文
用于言而止

此爲曹秋岳侍郎作

也秋岳前明丁丑進士以庶常改御史入本朝升沈淹
速不常厥居南游嶺表西北至雲中其與王襄璞飲酒
驀山溪詞云閒心千種惟有秋難著孤雁不禁寒又邊
鼓吹開畫角曾移小舸吹笛弄江煙多少事耐尋思斜
倚闌干角新添白髮回首平生錯無故踏征塵早孤負
花閒翠箔飛觥相屬同是客中人檀板急舞袞輕羸得

肌如削亦可哀其志矣

清苑梁鷓林以樟渡桃花澗訪恒上人詩不見桃花樹
惟聞澗水聲偶然尋去路一徑入霞城雪瀑奔崖轉松
濤靜壑鳴遠公過不厭閒踏石林平鷓林一字公狄崇
禎庚辰進士除太原令調商城乙酉後隱居白田其送
高二亮節歸平州云白頭羞苜飯黃葉夢樓桑別攝山
瞿大師云世緣谿水澹道味芋苗存白田雜詩云吳歛
楚舞雜羌歌翠靨紅顏駕橐駝一曲琵琶萬行淚朔風
吹夢渡交河孫無言寄懷梁公狄詩何處秋聲到草廬
一庭落月渺愁予風塵孫楚難爲客杵臼梁鴻好著書

盡室南游終汗漫側身北望總邱墟乾坤去住渾無定
且向湖邊學釣魚

錢牧齋有學集張五禪昭少年未娶不肯席帽北游虎
邱舟中戲爲題扇其第八首云一翦金刀滿鏡愁青春
和髮水東流明年娶得桃花女十五盈盈最上頭注謂
張五每自笑十三剃髮待明年娶婦好並上頭也邢孟
貞哭麻孟璇詩笑看頭顱只自如衝冠髮在蛻形初鄉
人莫話琴高事不學長川跨鯉魚李杲堂同周巖堂過
宿東臯草堂作憶昔始識君君年十八九隨爲萬里行
茫然隔杯酒豈知再值君鬚髮各鉗首移燈重黯然開

顏自知厚顧黃公對酒當歌行我初二十髮垂踝長嘯
每效孫公和綠絲鬢去十存一一縉二毛鬢尾拖諸詩
皆爲當時雉髮令下而作

黃公本崑山人蘄州籍有白茅堂集與廣濟張仁熙長
人竟陵胡承諾君信吳驥旣閑皆有名江漢閒其葺園
二首云荒墟漸廬舍邇來成四鄰園丁旣老病灌溉殊
苦辛幸免麋鹿齧翻嫌犬豕獠非關籬落缺廝媪抱爲
薪念彼生理困未忍加詈嗔尋思插芒棘刺手傷吾仁
物情好苟得刑罰誰見悛疆場且寇盜小犯安足嗔唯
當重風化寢使薄俗淳士林尙廉恥敷教羞彝倫上無

苟且政下有讓畔民干戈自偃息
化日長如春昨宵風雨壯日出課我童
樊榭旣粗葺設酒邀鄰翁嫗穉攀樹根
枓瀝亦得通三申守望義再講和睦風
皆云前樓取多出於流傭募炊而露食
迫此水旱窮聞言動隱憫語罷還深忡
假若設官櫛豈亦容剽攻處分一失職
攘攷紛相從草野弄金革朝廷問玉弓
人性本忠厚天心原大公懷柔王者術
孚格道所隆搔瓜有何益躡稻終無功
乃知鄙夫志用意苦不洪軾軻搆世亂
何以託吾躬漆女惜園葵安知中所恫

君信崇禎丙子舉人遺書有繹志讀書說讀書說卽繹

志之餘自比於徐氏中論顏氏家訓嘗謂人物凋盡之時賢士大夫無論在朝在野皆宜彼此互相成就如輔車之相依不宜更相詆訾如冰炭之不相容斯言豈獨爲明季而發固可爲千秋金鑑也王幼華磯上待月寄懷胡君信詩雨後綠陰繁涼氣生七澤遙念石莊人林閒岸輕幘缺月未離海殘霞忽斂夕獨鶴下煙江渺渺

楚天碧

王次山粵行紀事序唐顏常山之子泉明遭禍亂冒鋒刃瀕死亡而卒購父遺骸歸葬故里史家紀之以爲難然天寶之亂危而復存常山之節當時已顯朝廷有褒

揚史官有實錄故其事易著而不沒今觀壽名先生粵
行紀事一書竊歎其事與泉明相類而以孫代子職與
其所值之時所歷之境爲尤難也方留守公之守桂林
也明之祚已盡矣故主流離人心瓦解公社稷臣自宜
爲社稷死先生以弱冠冢孫不忍以祖側之無人潛結
死友代父往省自家赴粵轉側閩海九死一生僅而得
至及其求公尸而歸也懸命於大帥之手宛轉得脫匍
匐萬里出刀途血路卒達故鄉又可謂萬死一生者矣
尙能於其間裂裳刺血述所經歷紀所見聞家事可徵
國事亦可考豈非難之又難者乎方密之有行紀書後

一百二十四韻敘其事甚詳末云瞿氏在天下泰山視
施剞文章與事功後代稱殊絕西粵有天柱作屏開灌
榭留此虞帝祠奇功比禹尙天自祚本朝沸海會澄澈
元勳第一家祖孫盛闕閱東堂興禮樂抱經講縣絕請
爲知己言吹劍首者映長歎掩秋笳唾壺不待缺但書
忠孝字此字定不滅其詞甚偉中間有云偏安在嶺表
刻圭冕用鷲紐綬何纍纍薦紳毋乃褻太興殊寬容元
康未綜覈安仁枉望塵大連惜剛訐痛飲哀顧榮賈禍
憐郝絜鷓鴣善銜矢鬼域互蒙鱗客誰贈撲滿器誰鑿
糞養民苦南塘出又傷西柄揭荒膠斷牛犢被野網蠹

雖夏肆殷頑亦有以知再興之無望矣

朱青湖謂陳臥子司李紹興詩名既盛浙東西人無不遵其指授西冷十子皆雲閒派也西河幼爲臥子激賞故詩俱法唐音竹垞初年亦然康熙中葉始尙宋詩蓋自查悔餘吳孟舉出而詩格始大變毛稚黃著白榆堂詩陳臥子見而特詣之復序其畝景樓詩與陸圻麗京柴紹炳虎臣孫治宇台陳廷會際叔張綱孫祖望丁澎蔣園沈謙去矜吳百朋錦雯黃昊景明號西冷十子與西河及遂安毛際可會侯稱浙中三毛其春思二首云愁窺青鬢忽如絲春老繁花又幾枝提起玉釵成怨悵

忍將紅豆寄相思光銷畫燭珠猶溼夢入行雲月不知
細向屏風看楚黛此中何處不堪疑滿眼春風著意寒
春衣擬著更嫌單去年苔砌還生綠昨夜蓬壺滴未闌
玉杵有緣春蜥蜴寶釵無力壓龍鸞直愁亂落桃花處
細雨新泥不肯乾

黃俞邵贈林茂之詩八十才名徧九州七朝遺老至今
留聽談舊事開元載早識先人萬歷秋藜杖尋詩荒徑
外松風坐客小樓頭乳山咫尺能招隱我欲從公一溯
游茂之福清人崇禎閒移居金陵自卜生壙於乳山施
愚山嘗製芒帳題詩其上寄之一時多屬和者名曰詩

帳康熙丙午卒年九十七新柳篇云東風吹動楊柳時
初縈霧縷縮煙絲沿河閒陌方縈樹離雪辭霜始放枝
枝頭樹底看仍舊淑氣纔融春乍透濃淡青黃尙未勻
參差淺碧猶難驟輕黃淺碧露郊墟借草分蒲嫩有餘
裊裊亭亭嬌且怯纖梢短綫非一葉王恭張緒漫爭論
旅舍邊營正愴魂可堪繫馬章臺畔漸許藏烏向白門
白門紫塞那堪比逗暖凝寒異生死楚澤拂應齊漢宮
眠未起舞出腰肢門益柔畫來眉黛纖誰擬此時宛彼
欲成行此時攀折待條長翠樓忽使佳人悔驛路將令
游子傷曳雨搖煙口猶冷豔李穠桃色俱醒玉關羌笛

動遙聲灞上隋隄弄微影聲聲影影總愁人
軟媚飄颺詎可陳渤海高叢爭擬貴金城重見易傷神
多少鬢顏銷歇盡曾如楊柳故還新鄧孝威謂那子是詩四子風
調卻情致環生無擁腫堆塞之病所以爲佳

方文爾止號翁山桐城布衣明戶部郎中大鉉子施愚
山稱其詩欵曲如話真至渾融送沈致先歸宛兼寄令
兄眉生云秋江同作客春水又同歸何事棲遲久仍嗟
生計微對牀聽夜雨把酒問漁磯坐惜沙邊鳥乘風忽
背飛賢兄真處士抱道隱深山人世空相憶雲鴻不可
攀舊交多白首辛苦老朱顏獨有鴿原好今年又出關

旅夜云客舍已淒苦況同風雨聲一杯消永夜孤燭坐
深更飢鼠分行出寒雞失次鳴此時心眼靜歷歷悟浮
生居金陵以己壬子生作四壬子圖圖中爲淵明子美
樂天皆高座而已偃僂于前呈其詩卷姬人死于怨家
之手作長恨歌記之復爲作抱鴛圖宋荔裳題四絕云
鸞脰湖邊避亂時爲郎曾賦定情詩何堪再見張京兆
絕筆三年不畫眉天意偏教殺綠珠抱鴛人與墜樓殊
可憐冢上相思樹夜夜啼鴉傍晚烏鷓絃一絕永無音
莫怪相如飲恨深犢鼻著來將淚澣誰能更誦白頭吟
圖畫詩篇總斷腸人閒那得返魂香報仇才證西方果

來世應爲聶隱娘

余澹心一字廣霞別號鬢持老人莆田人江寧籍有味
外軒稿游憩南屏淨慈寺云小雨催孤櫂湖南別有天
幾家臨水住一塢倚山懸聲出花邊磬香流樹杪泉絺
衣渾欲冷高屐破雲煙游弁山資福寺呈霞肩師云一
片風篁隱翠微晚鐘初動白雲稀谿邊細草薰游屐石
上秋光點衲衣永夜松聲山鬼嘯諸天梵唄鉢龍歸趙
州茶熟人人醉臥聽空林木葉飛

陳元孝爲明給事邦彥子以布衣終其獨漉堂詩自序
云志學以往皆爲憂患之日東西南北不能多挾書卷

意有所感復不能已於言故於文詞取諸胸臆者爲多而稽古之力不及漁洋稱其詩在三君中尤清迥拔俗竹垞亦云翁山祇工五言不若獨漉諸體稱也趙秋谷謂嶺南四大家余識其三元孝與梁佩蘭王隼也二子之視元孝猶宋牧仲之並阮翁耳其送姜山上人游南岳云送師西去重低徊曾上衡山絕頂來夏帝碑蕪蟲篆徧楚天峰斷雁行迴鐙前鬼芋穿沙出霽後僧門鑿雪開正是到時三二月上方明月下方雷過薛劍公不值云竹窗虛掩讀書堂遠近游蹤日已黃舍瑟定偕童子去采芝還入老人行苔侵舊綠緣金井花散高紅點

石牀一度不留君未惜年年歸路屬春陽讀秦紀云謗
聲易弭怨難除秦法雖嚴亦甚疏夜半橋邊呼孺子人
閒猶有未燒書

徐處士宏澤以詩畫名萬歷中與李少卿日華陳徵士
繼儒聲相埒有竹浪齋集子柏齡節之崇禎三年舉人
座主爲黃石齋石齋以言事獲罪出至杭州愛大滌山
治精舍著書講學甲申以後忠節則慈谿劉振之錢塘
姚希允經術則海寧袁朝瑛仁和孟應春餘姚何瑞圖
書法則嘉興汪挺節之以詩畫頡頏其閒石齋贈以詩
云節之貽我詩十章大清脫石齋殉國節之秉師訓始

終不渝其節與其子燦心三世皆善詩畫論者以爲難
莆田宋珏比玉明國子生善八分爲詩才情爛漫信腕
疾書不加持擇其題朱白民畫壁詩云來時梅瘦未成
花別去垂楊金作芽他日相思如看畫版橋西望是吾
家客死無子江寧顧夢游與治走數千里往哭收其遺
文乞錢收齋表其墓與治少稱神童十歲作荷花賦善
行草書閩曹學佺輯石倉十二代詩選亟錄其詩刻之
曰眞詩也晚年爲洲田所累以書易粟卒無子窮老以
死施愚山經紀其喪收輯遺稿得十卷行世其乙酉除
夕詩云青熒鐙火不成歡薄醉微吟彊自寬何意有家

還卒歲久知無地可垂竿壯心真共殘更盡淚眼重將
舊歷看同學少年休問訊野人今已擲儒冠

沈文憲過落木菴題徐元歎遺像云大地留書卷香林
代子孫元歎吳縣諸生鼎革後葬父母天池山麓遂結
廬老焉自撰頑菴生壙志云喜登陟而筋力遂衰未廢
吟詩而發言莫賞其落木菴記云崇禎癸酉與竟陵譚
友夏在其弟服膺署中曉起盥漱見余白髮盈梳曰子
從此別必住山請擇嘉名以名其居服膺出幅紙請作
擘窠大字友夏爲書落木菴今三字揭諸菴門松栝數
株撐風蔽日元冬霜葉蕭蕭而下雙童縛帚掃除不給

齋廚爨煙皆從此出事之前定如此與靈巖中峰二高僧善各寫像貯佛寺有謚簫堂梁香菴等集年七十四卒一女歸許峽

五公山人王餘佑字介祺保定之新城人初從定興鹿太常游旣而受業於容城孫徵君甲申國變隱居於易之五公山嘗策古人經世事爲居諸篇十卷萬勝車圖說一卷兵民經略圖一卷諸葛八陣圖一卷又十三刀法一卷湧幢草三十卷文集三十二卷其爲文具有經世之術數千言立就書法道逸而感慨激烈之致一發於詩甲子卒

惲正叔湖上別朱朗詣詩海風鳴枯桑白日下西陲征
人策駑馬躑躅城之隅我馬不遑留與子當睽違去路
何迢迢攬轡立踟躕豈無夙昔好千秋非所期豈無平
生親金石將見疑榮名人所慕明義眾所訾荷子衷眷
言脈脈中心知未能致區區何以言乖離白雲悠然歸
大風來御之遵途有徂轍馳景無停暉山川詎云遠齊
願寧久睽暱勉嗣徽音慰我長相思朗詣名士稚世居
山陰怪山下明大學士諡文懿賡孫與張宗觀朗屋最
善時號山陰二朗門人私諡貞毅先生

錢塘汪颯魏美崇禎己卯舉人家貧耿介自守里有逮

繫者奉百金爲壽屬以請託固卻之明亡侍老母之天
台居石梁左右日糴米半升以供母自採蕨根淘汰食
之後母思歸移居河渚徙孤山足迹不入城市年四十
八卒間亦作詩多不存稿臨終口占云大化無倚軌道
術久殊轍住世守頑形問途猶未徹至人本神運可會
不可說冰泮水還清雲開月方潔一見破樊籠逍遙從
此別明詩綜刪爲絕句其意不完正叔贈魏美詩淒淒
革履歲將闌避世誰知管幼安桂樹幽人招隱地鹿皮
高士著書冠風檐解帶蘭香滿霜路班荆玉佩寒辛苦
西山無伴侶握中薇蕨勸加餐正叔亦嘗隨其父遜菴

避地天台中遜菴爲劉忠正公高弟以遺民終不愧
其師所爲忠正行實最詳丁戊之間嘗參海上軍事後
嘗爲僧

吳江王寅旭錫闡道興云大木蔭數畝青蟲生其陰垂
絲自相絡枝葉交受侵樹影日夕疏蟲窟亦不深貪生
戕厥本徒然飽飛禽託意極深又有句云我固冰雪心
炎燎不能灰又云蟬抱高枝鳴暘死聲不哀寅旭一字
昭冥號曉菴又號餘不乙酉以後忍飢杜門著古衣冠
尺牘多用篆體作楷書兼通中西算學撰有曉菴新法
五星行度解諸書所與游者桐鄉張楊園崑山顧石戶

嘗作天同一生傳云天同一生者帝休氏之民也治詩
易春秋明歷律象數學無授自通大義與人相見終日
緘默若與論今古則縱橫不窮家貧不能多得書得亦
不盡讀讀亦不盡憶間有會意卽大喜雀躍往往爾汝
古人所爲詩文不必求工率意而出盡意而止或疑其
有所諷刺然生置身物外與人無忤吾亦何容深求帝
休氏衰迺隱處海曲冬絺夏褐日中不爨意泊如也惟
好適野悵然南望輒至悲歆人皆曰爲狂生生曰我所
病者未能狂耳因自命希狂號天同一生天同一云者
不知其所指或曰卽莊周齊物之意或曰非也世莫知

其然否太史公曰余讀荒史見帝休之德軼於唐虞及其衰也多隱君子無不操行詭祕如天同一生語曰山高澤深風嘯雲吟非帝休之爲山澤則風雲何從生乎又其書後云天同一生挾近人之才不獲當帝休之隆與時偕行徒使志擬天地迹近佯狂以詭祕貽譏末矣然而觀過知仁夫亦安可厚非愚聞諸故老東望若木西望虞淵有天同一之區蓋生之所居云

寧都西郭外數十里皆石山其北翠微峰易堂九子講學之所也九子李咸齋騰蛟彭躬菴士望邱邦士維屏林确齋時益魏善伯祥魏冰叔禧彭中叔任曾青藜燦

魏和公禮青藜詩最佳其西竺寺苦雨云何代黃金寺
人來地覺偏綠霑高礎溼紅委小池鮮古屋生雲霧春
江走歲年似從巴峽住日日聽啼鴉方爾止茗上送青
藜之吳門詩獨攜破笠尋山寺稍喜貧交得酒徒

魏善伯爲本朝招吳三桂賊將韓大任遇害冰叔再舉
鴻博堅卻徵聘嘗謂西施太真後人並稱西施越女有
復讐之義與古今女寵亡人國者不同其靈巖雜詠云
野草臺荒秋復春至今遺恨浣紗人應知越女傾吳國
不比楊花覆白蘋

海寧朱一是近修崇禎壬午舉人兵後披緇衣授徒有

爲可堂集同顧修遠游虞山云輕舟十里汎平沙雲外
虞山一半遮隄勢遠回言偃墓草痕青入仲雍家野泥
初坵未開筍溪雨欲流將盡花乘興不辭今日醉此身
誰記在天涯僑居嘉興與周篔青士王翊介人范路遵
甫沈進山子相倡和青士有采山堂集嘗醉書五言云
似士不游庠似農曾讀書似工不操作似商謝奔趨立
言頗突兀應事還粗疏飢凍不少顧吟詩作歡娛

蠡吾彭之燦了凡明末諸生亂後游河朔依孫夏峰坐
餓蘇門嘯臺上七日死天下稱之曰彭餓夫時順治十
五年也其姓山人名通與上谷張秉暉結北邙社嘗聯

句云浩然歸去事如何不向邯鄲惹睡魔生死總同秋色老北邙山畔月明多吐棄世故時絕炊不以爲意每高吟云終日萬吞吐不道一俗字崔道母順天府學生以畫見知董華亭注名復社一二集與陳章侯稱南陳北崔甲申寇變走近郊陶穴中不出遂餓而死可與餓夫並傳

閻古古杏埵莊雜詠云星海滄江萬里游歸來更上探蓮舟青門瓜叟無名姓忌諱人前說故侯游莫愁湖云欲採芙蓉近晚秋微曛斜倚望江樓人生都向愁中老誰解閒行問莫愁其滄桑之感自在言外紀伯紫送古

古還沛句云自此虞翻思弔客誰從唐舉問方州

徐仲光晝寢詩幼女三齡而慧夏倚臥樓頭捉戶呶啞
不輟呵之輒曰儂開戶爲晝閉戶爲夜未已又開目爲
晝閉目爲夜予聞色喜而有此詩詩云閉戶聊成夜開
眸遂入晨晦明彈指事老壯隙駒身月解流連照花知
再四春最憐流浪處千古夢相因仲光名芳南城前進
士有松明閣詩此詩卽遺山六龍忽蹉跎之意蓋緣閱
歷興亡驚心轉燭寓意於隙駒彈指有餘恫焉

八大山人明宗室爲諸生世居南昌遭變棄家遁奉新
山中爲僧忽狂忽瘖隱約玩世初號雪箇後更號人屋

曰驢屋驢曰書年曰驢漢最後號八大山人行楷學大
令魯公狂草頗怪偉畫水墨芭蕉怪石及蘆雁汀鳧條
然無畫家町畦嘗題畫云郭家皴法雲頭小董老麻皮
樹上多想見時人解圖畫一峰還寫宋山河同時有魯
王孫怡如嘗畫故宮花草卷水墨澹沲是趙子固墨蘭
一派晚年叩門乞食窮老以死卷爲孔東塘所得又有
釋寂鐙字天放楚藩後裔住儀真東園十笏菴三十年
瓶粟屢空絕不干人有句云飯磬三朝斷毘盧共在陳
其小除夜示學人云一靜消諸累多能卽是頑與巖無
救勝事如要言煩多損精微之句同爲茗柯妙理

朱竹君乾隆壬辰九月拜無可大師像於浮山詩云衲
衣挂杖是何因故紙誰參空色眞悲頃錘沈滄海底笑
來帽脫宰官身秉忠夜語難成佛丞相鄉歸若有神象
教言詮都了盡卻將通雅付其人無夢無波自訂頑武
夷掃塔豈閒閒遠禪師帶收殘局浪杖人機自首山苦
海不登佛國岸破籃聊賣鬼門關萬安好住師須住骨
肉兒孫任乞還浮槎山在桐城山形正方高不過十仞
四面崖石壁立望如浮槎方密之出家居此自號浮山
愚者又字藥地晚年工畫怛化後方氏迎其肉身歸葬
子孫主祀弟子於廬山浮山各建爪髮塔破籃句謂師

嘗言我乃持破竹籃向鬼門關求賣耳其聽黔調山坡
羊云調自邊關到石城此方絃管更多情游人借得東
風力吹入江南後一聲猶憶秦淮賽竹枝青樓沈水易
相思眼看到處生離別何故多彈子夜詞自注山坡羊
本起自燕秦邊關後傳江南法家譜之曰沈水調流至
黔陽別成一調湖北多彈之獨往詩云一年三變姓十
字九椎心

盧德水一字紫房涑水人明初徙德州左衛光祿卿宗
哲曾孫卜居平原自稱南邨病叟嘗有詩云將書抵塞
三間屋用酒銷融萬古愁尊水園中合祀唐之子美宋

之五郎故以杜名亭自謂於子美詩四十餘讀爾來卻
掃益有餘力選摘分帙名爲胥鈔子美別李八祕書云
乞米煩佳客鈔詩聽小胥余與子美操觚充胥史而已
校之隸人伐木信行修水筒張望補稻畦豎子摘蒼耳
宗文樹雞柵占數鶩鴨頗樹微勳儻藉手以見子美想
裂餅給酒在所不吝又云子美詩如天降時雨山川出
雲木葉盡脫石氣自青第人之才識有偏全子美之詩
從奔走一世中轉寥寂耳五郎隱居十五年不出戶庭
桑下受風高人冷語侍御合祀蓋因以自喻云淵明有
扇上畫贊取以名其室曰畫扇齋其論詩曰世多以韋

柳配陶夫韋與陶差近柳則從謝靈運來雜之以吳均
何遜其悟處獨關禪理子厚自云惜無協律者窈渺絃
吾詩所得深矣又云論詩者長舌爲斧斲破瑚璉君子
有憂之又云作詩與論詩作畫與論畫總眎其胸次何
如天下事求之胸次足矣又云明詩當以高青邱爲大
宗有北上者德水附書於人云病中忽憶往時士大夫
門戶葛藤映及社稷輒爲慟哭意氣名節之假過於酖
毒人猶狂醒不已可謂大哀田綸霞選其詩爲讀本曰
南邨若有先生在小子當爲灑掃人牧齋云余爲讀杜
箋應盧德水之請也漁洋詩苦爲南華求向郭前惟山

谷後錢盧翁覃溪謂盧氏胥鈔其書不甚行於世昔在
粵東晤青州李南礪語及此南礪致書盧氏屬其家以
初印本見贈始知其非定本此蓋漁洋傳會其鄉人之
詞不可爲據也

程正夫尊水園集序云先生自評其文曰予四十年學
文只受用得一個快字余曰固也先生四十年學道亦
只受用得一個真字先生笑而不答蓋先生之快如秋
隼擘雲夏龍掣電又如光風霽月之下天水空明中攬
柁懸帆一夕千里乃先生之真則豈弟慈祥活潑坦蕩
義理可爲豐年性情可當化雨與先生交卽不覺醇醪

自醉至於立身大節明白周正儼然與日月爭光而自
放於酒則其作用之大晦迹於羣倫也又曰公稱詩一
遵少陵顧亦頗類青蓮正夫德州人有海右陳人集德
水序曰余於唐人中最愛張謂乃纔欲上口輒思吐卻
恐未領其微祇得其率獨吾友正夫藹然有王孟柳韋
風流余喜誦之以爲藥石生我夫二水同器有不相入
而高山深澤氣固相通此必有其合者矣漁洋謂其才
情不及德水而深穩過之年六十餽斷一切事詩署曰
餘詩曰冬者歲之餘夜者日之餘風雨者晴之餘六十
以後則人之餘人餘則詩亦餘矣嘗自作一棺題曰休

息菴自作銘刻其上酒酣便自偃臥有詩云版屋蕭然
密四周愚人息矣聖人休百年恍惚真疑夢萬事紛紜
已到頭廣柳何時催去駕猗蘭此夕詠閒愁相煩雅客
來欣賞莫待遙憐土一邱德水順治癸巳卒正夫康熙
癸丑卒亭林酬程工部先貞詩云縣上耕山日青門灌
圃時懷人初有歎裂素便成辭一雁陵秋濶雙魚入水
遲任城樓突兀大野澤參差物象今來異天心此際疑
風沙春氣亂彗孛夜芒垂見魃當郊舞聞人叫廟禧頻
翻坤軸動乍鬥日輪虧水竭愁魚鼈山空困鹿麋傷心
猶賦斂舉日盡流離旅計真無柰朋歡可更追秋吟酬

鮑照日飲對袁絲葢急當軒響花繁繞砌枝朱絃彌唱

古白雪每誇奇劒術人誰學琴心爾共知三年嗟契濶

隻羽倦差池尙媿劬勞憶來詩云看君行邁劬勞甚還添老大悲幾

陶尼父室獨近董生帷相傳德州有董子讀書臺器忝南金許文承

繡段詒清風來彩筆疏韻落芳卮西蜀元方草東周夢

未衰會須陪燕笑重和鄴中詩此詩作於康熙四年乙

巳至六年丁未德州過程工部詩云海上乘槎客年年

八月來每逢佳節至長得草堂開老桂香猶吐孤鴻影

自迴未論千里事一見且銜杯一旦唱和以朋字爲韻

遂十往復因日爲十朋詩正夫有周行中土三千里痛

哭先朝十四陵之句十四年乙卯亭林有送程工部葬

詩

青神余奮字生生號鈍菴以明經襲錦衣衛百戶明亡
謀結勦衛子弟兵殺流賊不克逃之江南參人軍事又
不濟黃冠野服僦居四明七子詩社奉爲祭酒署其居
曰借鑑樓陸披雲觀日堂宗正菴南軒陸雪樵歲寒館
皆與相望更唱迭和者二十年有增益軒稿春仲客廬
陵同友游神岡下翠峰寺云雨足天氣佳相攜尋野寺
曲徑緣陂塘青葱連雨氣深林隱茅茨蒼茫生遠勢曠
覽天地豁靜對人世異荒涼古時廟殘碑紀行事

宋紹興間

太后六宮泊舟於此俯仰傷心神甯爲榱桷替循崖入
得勅封今碑乃宋刻

翠峰積垣攢薜荔松古不知年離奇難位置賴此山水

情斗酒放情致日夕歸遲遲明霞麗幽翠蜀都行云自

我之成都十日九日雨浣花草堂益蕭瑟青羊石犀但

環堵生民百萬同時盡眼前耆舊存無幾訪問難禁泣

淚流故宮荒廢連禾黍萬里橋邊陽氣微錦官城中野

雉飛經商半是秦人集四郊廓落農人稀整頓凋殘豈

無術流亡安集誠可期但得夫耕婦鑿無所擾桑麻樹

畜隨所宜數十年後看生聚庶幾天命有轉移桐城方

子留文學名授自號圃道人旣祝髮從浪杖人游亦嘗

流寓浙東有奉川草其夜悲歌五首辭極危苦卒年二

十七

崑山徐開任字季重輯有明名臣言行錄百卷全謝山
謂其搜羅稗野諸鈔與實錄相參錯可謂勤矣至成祖
靖難功臣如張河間朱東平則並不錄竟闕一朝人物
不知何意其贈王太常煙客云曾侍先皇太乙壇昆明
復見劫灰寒一樽陶令猶思晉五世留侯未報韓擇地
懶沾新雨露避人還著古衣冠揮毫欲寫雲林意賸水
殘山不忍看

新城徐東癡王季木考功外孫漁洋外從兄弟初名元

善字長公慕嵇叔夜之爲人更名夜號嵇菴鼎革後棄
諸生居東臯鄭潢河上掘門土室絕迹城市有朱桃椎
杜子春之風九日得顧甯人書詩云故國千年恨它鄉
九日心山陵餘涕淚風雨罷登臨順治辛丑一游錢塘
至孤山坐放鶴亭下弔林君復詩云歸然一嶼水迴環
想見高風物外閒墓上梅開春又老亭邊鶴去客空還
書無禪草逢當世祠有賢名擅此山買斷西湖皆宋土
羨他生死太平間又過浙江泝桐廬登巖先生釣臺富
春山中酌謝臯羽墓賦詩云晞髮吟成未了身可憐無
地著斯人生爲信國流離客死結巖陵寂寞鄰疑向西

臺猶慟哭思當南宋合酸辛我來憑弔荒山曲朱鳥魂
歸若有神至其樂府云轆轤鳴井深淺樓高高去何遠
長白黃山人善琵琶嘗爲譜之與李賓之揚風帆出江
樹家遙遙在何處相似則其少時作也

掖縣貢生趙士喆字伯濬倡山左大社以應復社嘗削
稿縱談天下事思上之朝見陳啟新用事恥之不果甲
申後避兵登州之枳椒山與弟子董樵耦耕海上有東
山詩外石室談詩建文年譜遼宮詞鄉人私謚文潛先
生董樵字樵又字亦樵一名鷺字樵谷萊陽縣學生其
江東懷古詩云春風嗚咽鳴珂地寒食淒涼散蠟辰倪

仁吉嘗製方竹杖遺之陳其年爲賦方竹杖歌

長山劉節之題趙松雪調琴啜茗圖二首秋宮肅肅古
衣裳靜女無愁黛亦蒼不點疏螢和月色絹頭已作百
年涼厓山遺恨捲黃沙彩筆王孫弗憶家忍向卷中摹
舊事直須羞殺後庭花此與漁洋題趙承旨畫羊同致
惋惜之意吳興八俊自趙王孫被薦後皆相附取官爵
獨錢舜舉齟齬不合以終其身舜舉自題桃源圖云寡
合人多忌無求道自尊鸚鵡俱有志蘭艾不同根觀文
敏寄右之兄札云不肖一出之後每南望矯首不覺涕
淚之橫集今秋累輩旣歸孑然一身僅有一小孫自隨

悔心之萌語極悽黯固知雪衣玉粒顛顛雕籠不若桃源避秦人行歌游詣並怡然有餘樂也

鄒平張實居字賓公漁洋內兄家有湄園國變後卜居於大谷隱約以終老有蕭亭詩選清明云桃花乍放柳初生葉底春禽送好聲人在西園山翠裏斜風細雨度清明夜雪云斗室香添小篆煙一鐙靜對似枯禪忽驚夜半寒侵骨流水無聲山皓然明湖別業云微雨初晴劇可憐登樓四望碧垂天誰將一幅西川錦鋪向明湖

晚照前

萬年少崇禎庚午舉人與閻古古稱同志事定後卜築

清江浦曰隰西草堂其草堂雜詩云淮浦西邊開草堂
荻柴槿樹列爲牆意中笠澤千頭橘夢裏成都八百桑
唐室京華淹北斗楚人歌舞思東皇優游卒歲聊稱隱
處處蒹葭水一方深巷重門無是非閉關偃息看花飛
升沈日月此茅屋俯仰乾坤今布衣回雁浦中雲黯淡
射魚島外雨霏微著書未了復漁獵滿地江湖人未歸
縹緲淮東百尺樓舊時風雨一竿收奪牛亭上人先去
啼鳥聲中客自愁湖海未除看意氣潁川如故謝交游
幾回策杖斜陽裏煙水蒼茫正暮秋陰風吹巷偃斜陽
黃髮蕭蕭臥對牀出自北門逢雨雪行看西日下牛羊

蘭蓀香老無人谷櫻豆花遮避世牆爲問鄉農虞夏客
百年身世敝衣裳張瑤星送其歸淮揚詩達人志廖廓
世事等秣稊濯足臨溪水散髮晞朝陽溪水日東流歸
彼百川王朝陽隱豐蔀昏瞠鮮晶光擾擾焚絲中誰爲
振其綱慨彼北風詩虛邪徒自傷古古題隰西草堂詩
素壁承蒹瓦朱欄紐石藤求羊三徑客詩酒六朝僧澤
潤難窺岸山遙不辨層旅堂春綠曉餅食看魚罾秋水
堂前路塵封晝不開撫絃絕眞賞聞笛有餘哀花落樊
桐館雲收戲馬臺黃泉無驛使誰說故人來蓋年少沒
後作也

歸恆軒爲震川先生曾孫早年入復社與顧石戶齊名
兩人皆耿介特立有歸奇顧怪之目方史閣部守維揚
恆軒仲兄爾德名昭參幕府事城破死難石戶吳興行
云三年干戈暗鄉國有兄不得歸塋域高堂有母兒一
人負米百里傷哉貧比來海虞兩月日裁得白金可半
鎰歸來入門不暇餐直走山下求兄棺湖中雪滿七十
峰江山對君凝愁容冬盡月向晦慈親倚門待果見兄
骨歸心悲又以喜君向余太息此事不足言遙望天壽
山猶在浮雲間紀恆軒葬其兄爾德事也嘗與同縣顧
文康曾孫端木推官咸正舉兵不濟推官授命不愧相

門子天遠天邊被執石戶欲爲之經營而未得也後先
死於難石戶哭推官詩極沈痛恆軒行遯得免書淫墨
僻以佯狂終身其寄懷石戶詩云故人別去已三年北
望鍾山信杳然破盡萬金一身在青齊飄泊又幽燕知
君已謝魯朱家此去無煩廣柳車城闕山河千古壯可
憐不是舊京華石戶哭歸高士詩弱冠始同游文章相
砥厲中年共墨衰出入三江泐悲深宗社墟勇畫澄清
計不獲騁良圖斯人竟云逝峻節冠吾儕危言驚世俗
常爲扣角歌不作窮途哭生耽一壺酒沒無半間屋惟
存孤竹心庶比黔婁太僕經鏗鏗三吳推學者安貧

稱待詔

君叔祖子
慕字季思

清風播林野及君復多材儒流嗣弓

冶已矣文獻亡蕭條玉山下酈生雖酒狂亦能下齊軍
發憤吐忠義下筆驅風雲平生慕魯連一矢解世紛碧
雞竟長鳴悲哉君不聞全謝山云世傳萬古愁曲子瑰
瑋恣肆於古之聖賢君相無不詆訶而獨痛哭流涕於
桑海之際蓋離騷天問一種手筆但不能定其爲何人
所作近人或以爲謔翁或以爲道隱或以爲石霞皆鮮
證據惟魏勺庭徵君及其事於恆軒壽序予始取而跋
之沈繹堂詹事謂

世祖章皇帝嘗見此曲大加稱賞命樂工每膳歌以侑

食古之遺民野老記甲子哭庚申大都潛伏於殘山賸
水之間未聞有得播興朝之鐘呂者是又一異事也

潘稼堂雙塔寺雅集詩序云出太原郡城東南行可七
八里有寺曰永祚雙塔巍然捎雲礙日見三四十里外
浮浮若旌幢焉其下爲松莊傅隱君青主所居也太守
延津周計百歲初攜壺觴造焉竹垞有詩云憑君尋傅
叟暇卽過松莊吳蓮洋讀傅公宅詩感書其後云苦節
孤生竹哀絃寡女絲感君迸淚處是我斷腸時不死翻
成恨多愁祇益悲長飢忍蔽蔽高義北堂知青主名山
又名眞山初字青竹又字僑山或別署曰公之宅亦曰

石道人又字嗇廬晚號老蘓禪明諸生甲申後黃冠衲
衣居土穴以養母有霜紅龕集十二卷工分隸善醫畫
入逸品申梟盟懷太原傅青主詩云曾約溪邨訪釣竿
數年設榻待君歡亂離苦憶良朋少衰病應愁遠道難
晉國山川空白髮中原天地此黃冠幸將卷帙傳高跡
自向晴窗展畫看子眉字壽髦一字竹嶺常負竹或鐵
皆數百筋踰太行市以養親其詩名我詩集

己未詞科不就試授中書銜者青主及定興杜越越字
君異號紫峰其初小興州人明永樂間內徙定興之東
江邨爲鹿太常善繼高弟詩文刻峭深秀有紫峰集十

四卷亂後居新安管斗瞻爲築南鄰草舍執經者戢香
一時常謂名最誤人題壁云混迹依鷗近藏名應馬真
年八十餘飲啖不衰縣人高尚書問以養生之術曰無
之但平生未嘗嗔怒或以此得老壽耳

李中孚父可從字信吾崇禎十五年從汪喬年戰死襄
城越二十九年徒步走二千里至襄禱於社招魂以歸
亭林記異詩云躑躅荒郊酒一尊白楊青火近黃昏終
天不返收嶠骨異代仍招復楚魂少室愁雲隨獨雁潁
橋哀水助啼猿五千貂錦皆忠義孰似南山孝子門襄
邑令張永中爲立信吾祠邑紳劉宗泗割郭西田治大

冢以義林表於道洛中王屏翰題義林圖曰城頭慷慨
誰同調墓地蕭條有比鄰蓋宗泗之父某壬午同殉難
葬地卽居其左祠碑告成之夕鬼聲大作蓋中孚祝於
祠願以五千國殤之魂同返關中故也聞者異之癸丑
以隱逸薦不起戊午詞科中朝必欲致之以病固辭至
欲拔刀自刺亭林贈詩所謂從容懷白刃決絕卻華斬
是也

聖祖西巡特賜存問中孚整屋人水曲曰整山曲曰屋
自署二曲土室病夫有二曲集二十二卷

孫夏峰先生居容城白沙村年十七舉萬歷庚子科鄉

試天啟乙丙間左魏被逮光斗弟光明大中子學淨相
投周順昌寓書有一身作客同張儉四海何人是孔融
之句義激而起與定興鹿正新城張果中傾身營救爲
兩家子弟計棲身之所世稱范陽三烈士顧亭林詩蒼
黃悲詔獄慷慨急交親指此壬午迄甲申避地者三有
掃盟餘話引田子春避地無終山掃地而盟之義鼎革
後累徵不起渡河止蘇門百泉馬光裕奉以夏峰田廬
築堂曰兼山讀易其中督子弟躬耕自給馮大木詩云
蒼茫亂雲西落日射潭影隱隱蘇門山恍惚露靈境中
有披髮翁讀易消晝永雲臥歛臺側鸞音出半嶺居夏

峰二十五年康熙十四年卒年九十有二其自贊曰間
爾爲誰曰歲寒氏歲旣云寒爾何爲爾曰幼讀書妄意
青紫長知立身頗愛廉恥雖困公車屢蒙薦起骨脆膽
薄不慕榮勢衣厭文繡食甘糠粃隱不在山逸不在水
隱於舉人七十年矣繞鄴多男及門有士老而學易欲
探厥旨聊以卒歲如斯而已其講學宗陽明而歸本於
慎獨

錢塘布衣潘雲客間奇字雪帆詩與田梅岑合刻田曰
埋照集潘曰拜鵑堂草寓揚州天寧寺傳育菴時爲太
守分俸爲之置田客死葬之平山堂側爲文志其墓查

二膽書丹其郟城詩云舍權纔逾宿征塵又滿衣酒漿
經魯薄楓葉過淮稀水涸魚仍賤秋深棗漸肥津亭多
麥飯此日可調飢葫蘆谷云一徑如蛇入蒼藤手自分
石生都是筍嵐起不成雲覓路經熊館捫弓散鹿羣日
晡逢鬼唱疑是鮑家墳紀陳震生與友人話別云四十
年前數弟昆後來生事不堪論身如魯殿經秦火世若
麻姑語上元倏爾竟成三度淺巋然曾有幾人存今朝
話盡西窗燭可是當時舊酒樽巖灘云漫整荷衣酌逸
民灘聲猶自動星辰富春近日誰漁父天子當年有故
人名到先生纔是隱賢如光武不曾臣羊裘去後煙波

潤留得桐江一釣緡秋興云少小襟期與世違布袍時
復傲輕肥爲尋無忌棲梁苑曾弔靈均入梯歸苜蓿花
寒天馬病神仙字老蠹魚飢睛窗檢點奚囊句風月年
年有是非書陳將軍便面云虎頭垂老臥江濱李廣空
餘百戰身馬蹶平原芳草綠角弓閒殺射雕人梅岑詩
如鬢冷牕侵雨園荒燈引蟲破扉猶入燕老樹自生花
亦復冷峭

彭羨門少宰學於其兄孫貽仲謀仲謀一字彜仁終於
諸生鄉人私謚孝介先生有茗齋集其遺懷云南陔聞
轉戰嶺上昔經過葦路連熊繹枕榔隱尉陀春歸巴鳥

怨雪盡越蠶多何日還初服雲山臥薜蘿尤工長律天
壇晚眺云周垣環輦道雲物鎖園丘大典刑牲帛祠官
職冕旒銀潢扶砌落珠宿抱壇流二祖功殊絕羣倫博
考諏乾坤含一氣岳瀆祀諸侯神鼎高陵闕齋宮御蹕
留綠苔蟠古簋香草入空甬夾路松陰直虛筵鳥跡浮
兩京分邾鄆百戰定嬴劉五馬今南渡三山控上游長
江龍虎闕孝廟石羊秋野蝶飛花緩春蕪燕子愁何時
上封禪一爲奠神州謁豫章鐵柱宮云巨澤東南陷元
宮戶不扇自來留讖緯一柱奠流形忠孝傳丹術神仙
配帝庭功成先拔宅水怪續圖經蛟蜃窺雙劔陰陽護

六丁至今存廟貌在壁繪精靈革鼓縈蛛網華冠斷鶴
翎高甍羣瓦綠遺烈萬山青遇劫焚殘籙重游索舊銘
庚辰扶鐵鎖星斗落旗鈴石井何年泐江聲不可聽願
隨鸞鵠去馭氣上青冥著有流寇志林璽菴太常議其
但憑邸報流傳事多失實宜興胡天岫與仲謀詩武原
吾舊住結屋近滄溟鹽井縈沙曲魚風入市腥秋雲蝨
浪黑夜雨鬼燈青會有乘槎興還尋織女星

詩以五絕爲難工邢孟貞客思云客心如游絲偶墮青
苔上一受東風吹晴空卽飄颺江南詞云向晚颺塵起
青門舊路斜御溝流水盡日日過牛車山家雜詠云童

子朝眠起枝頭打乳鷓鴣飛還繞樹不肯去西家宋未
有孝廉佚山中夕照雲林壑有餘色夕陽猶在山浮雲
休亂起還讓照人間李香河同知恆焞渡錢塘江云一
櫂吳兼越秋風江上生江潮多少恨常作不平鳴均有

唐音

邢孟貞王言遠潘孟升五言詩均爲漁洋所推今略錄
數首如左孟貞溪行屢經亡友印度別處云濺濺溪水
側是子門前路涓流亂石間褰裳乃可渡憶昔造子廬
款款平生故尊醪亦時有日晏未遑去相送屋東偏幽
林每徐步欹岸注微波殘陽在高樹情因老易悲欲別

恆反顧茲來溪草綠
偶到臨分處子猶耿素歡子已長
不寤流泣但徘徊空慙子桑扈憶幼子云汝生初墮地
我游五茸城三月始入門聞汝呱呱聲從此更遠邁越
嶠東南征三爲象浦客六傍惡溪行在遠日何多在家
日何少屈指幾度別垂髫忽已好三歲別我時門前牽
我衣宛轉學人語問我幾時歸四歲及五歲別我涕能
揮七歲差解事鞠躬步庭幃去冬復別我含悽叩所如
本言渡江去卻寄金陵書今汝年九齡毛詩誦曹鄴翩
翩過父友再宿傾肝肺前日有書來頗與人意會世亂
我已老我衰汝始大如何久契濶喟然發長嘅王言遠

棧道中作云人行山上高天在山中小員暉易沈夜初
陽遲報曉馬走山樹巔飛鳥出其下雲連深洞迷石缺
危橋架七盤非險途三秋足清景日夕流泉聲安能辨
喧靜潘孟升曉上焦山絕頂至暮歸宿山莊云初日江
瀧瀧荒煙不可罷稍見蘆洲出茅茨已如畫人行穿鶻
巢路窄盤石罅幾時攀險絕早已驚衰謝峭碕插寒空
孤騫勒奔瀉一盡巔崖趣旋從別徑下落木響空山潮
聲杳清夜旣歸路非遠欲渡風稍借可憐江上月先我
在茅舍山重一雁呼窗暗青燈爇有酒卽相傾無酒還

當貫

邢孟貞琵琶亭下作云誰知此夕江州淚非復傷心爲
四絃鄧孝威枕煙亭聽白三琵琶云寒日園林尊酒陳
琵琶急響似西秦赤眉銅馬千秋恨譜入鷓絃最感人
北極諸陵黯落暉南朝流水照青衣都來寫入霓裳裏
彈向空園雪亂飛白狼山下白三郎酒後偏能說戰場
颯颯悲風飄瓦礫人間何處不昆陽天寶纏頭竟屬誰
四條絃子斷腸時蠻鞞窄袖當爐女今日公然識段師
同一別有懷抱也孝威嘗同龔端毅過梅嶺詩名過嶺
集

馮定遠與兄舒已蒼稱二馮著有鈍吟雜錄其雜詩七

首頗似子山近體如兵後送友人避地云尊酒傾未盡
征車發已遲可憐從此去長似憶君時燐火宵行怯爐
煙曉望迷詩書旣無用何處覓新知重經沈氏園云昔
年無賴此猖狂一飲從教一石強鬧曉醒時鶯燕亂趁
春終日蜨蠶忙浮雲帶樹添山影嫩藥封條門日光此
事可堪惆悵極抱山堂後舊長廊題小刀云一尺清光
勢似鉤鏑邊名姓舊來讐未甘孤怯常磨看自恨粗疏
更密收無質竄煙輕欲動有情秋水凍難收欲飛七首
堪爲伴但斬蛟龍不覓侯錄舊詩淒然有作云腸斷凝
塵掩鈿箏寶釵當日挂冠纓蘭膏入髮盤雲膩霜素裁

書獨繭輕焜火不教留玉燼鮑壺何處著冰清堅芳損
折由來事莫向圓穹訴不平均勝工四體書有日記及
誠子帖論書法入微趙秋谷心折於馮氏之學每購得
鈍吟片紙喜動顏色曰此希世之珍也至自附私淑弟
子論詩輒引馮先生云何其推重之如此子行賢補之
詩有父風尤工篆隸行貞服之喜填詞善射能以後矢
落前矢投石於百步外無不中山行遇虎倚短槍自衛
相持良久卒斃之

海陵吳野人名所居曰陋軒甘心窮餓其吾廬詩云吾
廬清溪中年久半傾圯圯者不復問存者還欲倚老梅

共橫斜撐拒臨流水有客念積廢贈糧令葺理負戴駭
鄰人升斗分匠氏仍缺石與木來朝賣一豕力作何紛
紜癡兒間老婢窗牖次第明巷徑復委委家人意頗貪
指點舊基址乃欲典衣裳更求廣居止微笑謂家人戶
外寒方始且留此隙地以待春風起我自荷一鋤種菜
柴門裏與吳鱗潭祭酒善鱗潭官京師夜夢野人索棉
布十丈詰朝寄詩與布野人得之曰神交哉報以詩見
金會公所爲吳祭酒傳漁洋謂野人出游後詩亦漸失
本色要其志節固初終一轍也

揚州歌伎沈隱字素瓊工詩落籍歸徽人夏子龍子龍

諸生也好詩酒得隱倡和甚樂甲申之變遂與隱窮日
夜酣飲不復休南都未破而子龍已得奇疾不可療遂
死屬纊之日隱憑屍而哭曰天乎其亦知相公所以死
乎哭罷盛飾投纆棺旁家人爭救之不能得有夏基者
子龍之族也歎曰子龍求死而得死是求仁而得仁也
然而雖得之猶恐日未遽瞑得隱之死或可瞑乎錢光
繡爲賦幽澗泉曰幽澗泉清幽谷蘭芬彼美淑姬乃倚
市門啁啾燕雀集於梧桐巢枝啄實不改其容有鳳來
歸爰作鳳宮嗟嗟雀兮厲翮高翔嗟嗟鳳兮鍛羽旁皇
胡然靡吡昊天不臧萎身尺練隧壑偕藏誰謂臣能忠

乃在樵與牧誰謂婦能貞乃在桑與濮皚皚雪霜皎皎
玉谷蘭不芬芬者猶澗水不清清者瀆噫吁嘻兮我爲
天下哭

種餘老人趙雪余懷高雲客詩客裏逢迎盡相看獨至
情三冬榕不雪一刻鳥無聲海國風愁定江城月共明
遺安堂上酒容易與誰傾雲客名兆侯官人有遺安堂
草其荷蘭使船歌代友人紀事謂船上周遭刻木偶如
人以疑遠大佛郎機百位含伏檻中外裹牛革每月塗
伽馬漆一週故堅固上下以藤結梯雀室船中候望之
竇番兒見客緣梯從竇探首以手援引客登船施放諸

砲爲敬船上人無事則負手閒行竟日于周不息不測其故船中央以匱閉大羅經爲行舟指南之主最鄭重帆以布凡七張之受八面之風桅檣皆鐵束裹帆絳交結如網船人暇升絳坐臥其中遠望如猿獠船下數層深數丈船第二層以四鐵索懸大釜作食船面有土種蔬舶盡處牕皆玻璃飲器皆以桁懸懼舟行傾仄國俗行酒以傾瀉杯中成珠爲禮瓜蔬味酸脆碧色可餐木爲筆如冠簪而細是日于其貯筆處得一卷長丈許繪畫山水各有番字如蟻分識其下考之皆五虎門內外沿海地圖及水深淺處詰問譯人以識水停船爲對時

使者相對旁皇可以考見當時番舶之制

顧景范撰讀史方輿紀要百三十卷魏叔子爲之敘稱
爲數千百年所絕無而僅有之書其送叔子還寧都詩
天地方沍寒君行涉江水問君行何爲抱膝深山裏易
堂好弟兄事業記文史天空鷗鷺飛日落雲霞起遙望
翠微峰迢迢四千里吾欲牽君衣君行其少俟好風從
東來揚帆急如駛山中正春光寒香放梅蕊

嘉定侯氏太常震暘通政峒曾太學岐曾有三忠祠吳
梅村過嘉定感懷侯研德臨江仙云苦竹編籬茅蓋瓦
海山久廢重耕相逢還說廿年兵寒潮衝戰骨野火照

空城門戶凋殘賓主在淒涼詩酒侯生西風又起不勝
情一篇思舊賦故國與浮名研德名泓更名涵字中德
私諡貞憲先生論詩本之自得苟自得之師心可也法
古可也有掌亭集揚州句云十年蔓草梅花嶺手把蒲
葵淚不禁謂史道鄰以五月殉節秋懷云父老未忘陵
谷變陌頭猶話建炎朝時所居爲蘄王故壘也弟澣字
智含有孝隱遺稿

魏子敬爲忠節公大中子有茆檐集長水怨爲友人妾
賦云妾家住長水長水東西流青青湖畔柳迢迢湖上
樓十三學釵書十四工箜篌十五臨窗繡精妙世無儔

翩翩少年子窈窕行相求借問樓上女可似羅敷不里
姬前致辭願君且淹留美人好顏色終日樓上頭兼之
臨窗繡精妙世無儔君子謬垂盼聞言中心喜語我長
者行同聲謂應爾郎君美風度玉樹蒹葭倚十九渡長
江聲名若江水好花不獨榮天生合連理行行隨君去
默默思故里牽帷幾回喚低眉羞欲死臨鏡貼花鈿可
憐體無比紗牕春日午脈脈情何已憶我在家時拈香
繡大士金刀翦素綾瑩瑩白於紙刺成蓮花葉彷彿香
風吹香風吹入夢夢到蓮花池繡痕細難織但覺生蛾
眉靜玩坐逾久忽忽心自疑似曾親見佛不知身是誰

綾額尙餘尺皚皚冰雪姿淡濡碧玉毫邀郎爲題詩郎
書擬右軍妾心亦委婉鍼鋒與筆意曲折隨郎轉繡罷
持似君秀色堪舒卷顧我每微笑妾顏先自靦落地爲
女子可憐側室難陡然一回想心事慘不歡雖復蒙君
憐鮫綃恆不乾大婦貴家女妾身臧獲看上堂伺音聲
下堂候顏色含羞入空房惻惻潛相憶雖然潛相憶無
用長太息誠得君子歡不怨長離隔大婦奄逝世一家
身獨當漂蕩若浮萍隨君流四方南都復北都終歲長
道傍黃金散欲盡不思歸故鄉壯志在四海妾心暗悲
傷君怯不勝衣年來益憔悴十日九臥病奄奄滯旅次

妾首如飛蓬并日忘食事上無姑嫜親下無得力婢旋
出又旋入常恐呼不至憂勞填胸臆刺刺肝腸碎歲月
漸消耗妾身亦不支帶圍亦趨緩空復存腰肢事君垂
十載不一生男兒羞佩宜男草悵然心中悲君嘗兩畜
婢中道嘗棄之妾身非不容君自輕別離暮春三月盡
束裝謀南歸買舟僅如葉帷幕不得施長夜泊豐草巨
蚊攢冰肌生小長閨閣辛苦實難爲入秋弛行李儻人
樓上居小姑家海濱聞之亦來依雖非久居計氣息聊
得舒良人忽生心娶婦支門閭隨珠飾翠幃黃金飾綺
疏紅羅複斗帳寶馬七香車今日媒妁來東鄰有美姝

明日媒灼來西家有西施妾身匪木石焉得不孤悽對
鏡影如削安敢生言辭禮數任頡頏難比先孃時新人
入門來灼灼豔威儀二九頗不足二八頗有餘女伴覲
鸞幃嘖嘖相嗟咨君心愛幸絕迴與舊人殊非必顏色
殊新舊自相渝新人哭亦妍舊人笑不如孤房遇慰藉
眇睽聊斯須情知心不存詞說空爾爲新昏浹旬日忽
作南都游俗語莫空房挽衣不能留新人暫歸寧登車
去由由妾身姊爲母同君亦登舟耳綰雙明月墮髻垂
金塗飄搖蕩湘裙色如安石榴輕盈作纖步翩若雲端
游鄰女相擁簇朱顏自生羞十年方得歸一喜還一愁

顧君色悽慘何用心恻恻莫非眷新昏懷此離索憂干
喚不一答默默自低頭舟行到長水妾自還家裏親戚
往邀君君固不肯起詰朝云解維舟中須盤桓勿用再
往返各使中心安恐君塗上寒幅巾裁合歡恐君塗上
飢烘粟盈朱盤木落霜露急勿使衣裳單干語屬奚兒
勸君幸加餐平明奚兒至顏色驟驚顫向前往叩問淚
流先被面郎君乞致辭此生勿相見十年恩愛深謝卿
重依戀奈卿久專妒會見中情變不如痛割絕免使長
輪轉妾身得聞之狂頓摧心肝天乎我何辜天乎真無
端雖在夢魂中不料遭棄捐恨無晨風翼迅駛追君船

淚珠千萬斛那得飛君前牽衣一慟哭身死妾亦甘縱
然被驅遣曷不先一言一去永決絕何處鳴煩冤自從
入君門歷今垂十年雖彼雞與犬亦當念周旋如何鐵
石人一絕弗復憐椎胸胸血嘔委身赴清水骨肉痛如
割龜勉相救止姊恩父母深我生不如死尙冀南都還
重來過君里性行吾熟知茲望殆已矣昔年別兩妾我
淚揮不止誰料行及身苦境苦如此嗚呼倉浪天茲恨
何日已新人入我門繡帷長日垂依稀觀容貌猶未通
言詞臨行詳睇視恰在登車時蚤知生死隔揮淚一致
辭念與小姑別淚落如連珠妾初進門來小姑九歲餘

探懷索果餌髮亂呼我梳今來已成婦骨肉情依依長
別不一語腸斷當何如我有兩了鬟事我五六年大者
髮覆額小者亦比肩晨興聽呼喚夜深候我眠而今永
隔別涕泗紛潺潑平時解思我料爾當亦然掩淚入房
來牕前見鍼帖殘絲與賸綫寸寸皆儂血向日入君目
從今長斷絕妾婉隨郎心郎心太曲折忽見大士像不
覺涕滂沱稽首乞慈悲妾身竟如何今生無罪過宿生
讐怨多安得轉君心春風被女蘿君心終不回不如赴
長河稽首乞慈悲再拜涕漣漣不望重聚首但願相見
時雨落不上天一見知何期婦人失夫心百念無可爲

但願新人歡爲君生男兒更念孱弱身疾苦不相離
人識君性新人安得知十年守窮賤心事多苦悲願君
振高翮及時凌風飛妾身長已矣相見知何期一字一
嗚咽行道皆酸悽朱近修謂其源出孔雀東南飛作而
不盡規橐字句才氣無前後來惟胡雲持女李三行一
篇堪與頡頏彭芸楣周牖如太夫人冰鶴圖一首極力
放筆不能逮也

宜興吳湛又鄴明亡以詩酒自娛有篋吟草其百字令
云西風初起聽誰家搗練聲聲響澈句引離人多少恨
又早露凝霜白叵耐年年照人無寐總是清秋月相逢

鄰叟莫將喪亂重說際此兵氣銷沈蘆簾紙閣稱長齋
持偈卻憶年時珠海上畫舫歡游時節笑插黃花醉牽
紅袖任把長鯨掣可堪回首繁華如夢銷歇與陳其年
善又鄴卒其年有詩悼之云風情氍毹偏無賴筆墨蕭
閒也不羣憶得秋城鷗萬點墊巾曾與立斜曛

顧亭林先生小名蕃漢見王德甫存養齋集

長吉飛卿七言古詩音節格調於同時韓白諸公之外
自樹旗幟其濃麗處亦非不學人所能余澹心茗溪四
時豔歌蘭茗發春香噴玉風篁拔地敲新竹雪水分流
合四溪淺草茸茸過山谷文舫擁酒看桃花綠葉青青

是妾家屋裏鏡奩藏小鳳門前楊柳散啼鷗一錦旗霧
暖遮團扇膩藥蟠花覆冰簟燕語雕梁翦綠雲鶯啼別
院搖紅綫編如車輪筍如斗夾山錢山浪西吼柳憚道
遙杜牧狂項王馬詩飛劒光二我有玲瓏秋玉佩贈君
篋中三尺水桂華爛漫湘娥愁飛入吳潭打蛟起煙梧
露井隔銀塘美人彈箏坐曲房倒轉天河寫明鏡碧湖
射落青天影三冷光融融碎銀浦龍堆積雪鬥哮虎一
郡荆榛嘯午雞小槽滴瀝傾雲母金爐煨芋墨花寒插
貂披裘迎彩鸞干峰萬峰半夜白賦成枯樹歸未得澹
心以高士而隱於聲色間數詩足見其風趣尤西堂詞

滿目山川汾水雁半頭霜雪燕臺馬問何如變姓隱吳
門吹簫者和梅村贈澹心作也吳江沈桐莊書板橋雜
記後云春從柳永詞中老秋入蘭成賦裏哀亦能道澹
心著書本意

鷹阿山樵戴本孝推官戴重敬夫子布衣隱居以守硯
名其菴賣書畫供朝夕其登張家口城樓詩馮僧譯通
中外市馬牛氣雜往來車成容若有爲王阮亭題戴務
旃畫詩程湟溱送其游西嶽詩君本忠孝人濁世稱大
賢束身爲圭璋所志非僱佺振衣仙掌厓洗耳玉女泉
皎然脫物役可以臻長年

陳伯璣答熊奉常云客心傷歲晚倚櫂聞歌聲歌聲一
以歇谷響寒潭清孤舟不能發古調感中情曾是澹蕩
人忽爲塵網嬰嚴鄭長遁跡張邴甘辭榮豈無好爵縻
千載高其名邱園可棲遲文史足經營俛首徇世務無
乃負此生君言良非誇吾願亦易盈行當攜妻孥白首
從耦耕性嗜書嘗續顧元言國雅

張卿子遂辰少穎異工爲詩有野花詩十首人目之曰
張野花善病常數年不出戶面孔黃瘦人有見之曰是
野花張也明末潛名里巷爲醫自給能探丸起人死人
爭迎致之詩格澄澹孤峭多自得之語有白下湖上蓬

宅衰晚四編忍公無敕招入六逸社簡謝云東城有老
生三五接茅屋聲名雖翳如志色不降辱乞食拙叩門
爵年少賜粟二巖天放翁舉逸嗣其六高會相招邀甯
恥敝冠服寄情在琴歌養老事觴肉詎惜恕疏狂禮容
亦簡足持論昧苟同古風良可掬白首永宴言娛懷還
厚俗忍公名武順無敕名敕與兄印持調御稱三巖自
餘杭家錢塘高隱不出兄弟有作朋集顯亭司農爲忍
公子割金中丞學會別業之半築皋園其官都諫以憂
歸也施愚山同宋荔裳集皋園詩云阻隔歲將宴齒髮
交積侵見君復銜恤隕涕霑衣襟踟躕展燕婉別墅延

登臨回谿貫湖水近圃緬邱林參差梧竹秀凌亂荷葦
深微雨緩良宴故歡感夙心疇昔在京洛七子相追尋
惓惓古人義慷慨揚清音浮雲倏飄散天路殊飛沈英
華易凋落煩憂故難任相顧各歎息嘉會方在今各勉
歲寒意無事徒悲吟其歿於京邸也徐華徵鄴挽以詩
云卜築東皋闢草堂城隅樓角望蒼蒼清秋風景朱門
客他日登臨憶侍郎無敕子津字子問亦能詩顏所居
曰陶菴金中丞別業至今里人目爲金衙莊嚴杰爲灑
亭七世孫

卿子冬曉尋東鄰諸子云東城愛清曉日出在寒林殘

葉響冰面微霜留屋陰事皆緣老謝迹賸有孤尋忽漫
聞村犬悠然門巷深隱几云一區城曲地還餘隱几蕭
蕭落木初賸墅吹樓無子弟故家遺俗有琴書天遙欲
縱高飛鵠池白長留禁射魚尙惜興疏交漸絕朝來斗
酒爲誰儲其過徐鏡非閒坐云朋舊今無幾所欣俱老
翁累因遺嗣少閒賴一官窮每過寒齋雨共聽秋樹風
商山多翼贊吾願采薇終鏡非名行恕中萬歷癸卯浙
江鄉試嘗爲德安縣令鼎革後杜門不出與巖印持及
卿子稱三高詹去矜鍾玉贈鏡非詩云徐令本廉吏高
擬陶彭澤早歲擅時名垂老厭兵革晦迹城東隅蕭然

半畝宅茶人夙自署茗盃供朝夕健兒不敢窺閉門無
俗客擾擾市朝間世眼徒青白

陸冰修嘉淑海寧人有辛齋遺稿采桑曲云江南三月
青陽天桃花匝市楊花顛流鶯自語元鳥斜陌上誰家
雙鬢鴟繡箔柔匡臨碧圮百帖春蠶眠不起素腕迢迢
倚夕陽清臚的的回秋水別有梅花洞房妾永日盈盈
淚凝睫織成錦字寄別離結成同心鎖笥篋偶向城隅
恨自滋長憐春暮心尤怯使君五馬莫踟躕兒家夫婿
關西俠查夏重其壻也少從學詩

王崑繩孤忠遺翰序云武林陸鯤庭先生乙酉死於難

留書辭其母及兄弟其兄麗京先生集一時南北殉難如倪鴻寶陳木叔黃石齋諸君子平昔往還書牘贈答詩古文裝潢成卷而附其書於後題曰孤忠遺翰藏之後麗京先生亦遂棄家長往不返其子寅尋之十餘年不得遇丙寅夏寅遇源於京師出其卷示源使源爲之序按鯤庭先生名培以庚辰進士居憂未受職甲申之變南都授行人奉命祭奠淮王而南都不守遂止山中杭州下乃自經麗京先生棄諸生醫隱養母後母卒罹莊史之難幾死乃歎曰吾向不與弟俱死徒以有老母母旣以天年終今又遭大難幸免尙可以餘生食息人

間邪遂棄妻子披髮入山寅又以其辭家書數紙與小
像并附此卷後今觀其像雉冠戎服挾弓矢袴鞞縱馬
而馳是豈山中學道之人哉又可悲矣初先生罹難時
家人俱繫獄吏籍其家裂此卷將燬之先生內弟孫君
宇臺奔入流涕白吏曰此無用物燬之曷若與我我義
存故人片紙卽諸君義也吏笑而許之事解復歸之先
生此卷得不失者孫君力也先生名圻季弟堦人稱梯
霞先生某嘗訪之吳門岸然高潔士也寅字冠周負至
性亢爽有大志善文詞工詩暴書亭集有零丁爲陸進
士寅作云寅也敬白零丁尺半紙敢告行路諸君子有

父有父一去故鄉不知日月幾千里日月逾邁二十五
年矣請說軀體顏面皮軒眉廣顙豐兩頤口輔鬣鬣微
有髭去時牡齒尙未落肩胛尙亦肥平生不怒多笑嬉
目無邪視頭無俱周尺一尋長過之請說裳衣少新製
大布寬袍淚長漬帶斷續繩衫裹臂孫孫子子蟻蝨萃
有時捫之擲在地兩襠做袴雙足扉寒肌生粟暑生痱
婆留鄉語聽易分問以經術辭紛綸至若說易尤專門
方州部家味易根囊中口譜可等金匱文方不自祕恆
活人不昧財不逐禍緇衣黃冠無不可惠而能以消息
聞爲德者君報者我葢麗京論釋後游嶺南依金堡丹

崖精舍一夕夢至琳宮丹梯碧瓦中有神建龜蛇之旒
寤對寺僧言狀僧楚人謂曰此太和山也先生乃易道
士衣往訪竟不知所終冠周康熙二十七年舉進士既
釋褐微服往求竹垞效東漢戴良體代作零丁一篇授
之持以入楚云竹垞辛丑同王處士猷定施學使閩章
陸處士圻汎舟西湖遇雨云東風吹落日西下北高峰
欲往南屏路中流聽梵鐘迴船沙岸火驟雨石門松不
覺碧雲暮涼煙生幾重零丁序云予早歲以詩古文辭
受知先生遂定忘年之款自辛丑夏一別水尙知歸先
生獨久不返辛丑爲順治十八年湖州史案在康熙二

年下距冠周戊辰舉進士正二十有五年也

鯤庭子繁弢字拒石韜晦鄉里閉戶著書學使張景茂許備員豐宮報書辭謝徐健菴延課其子其善卷堂文集卽司寇仲子章仲所刻鯤庭殉國難絕吭於桐陽引決時留書與陳際叔別且盡以書籍遺之際叔聞信奔赴哭之痛爲書以報地下美鯤庭之得死所敘己有母且尙在草野不卽相從之故無何陸氏竄徙駱村鯤庭配夫人延際淑於蕭寺教拒石拒石學旣成乃還其所遺書籍其交誼如此駱村一名駱隴陸梯霞駱隴看拒石冠周兩姪云流水飛花古渡頭橫舟盪槳欲驚鷗遙

憐多病三秋逝近喜新詩一卷留看竹祇須尋小阮栽
桃還想賦前劉卽今滿眼悲烽火好慰慈親此放愁

王于一客燕與內僧話有世換人多默語低心可憐之
句清明後一日登文游臺云日斷長湖三十春千帆暮
雨海東塵梨花白雪臺前客麥飯黃冠夢裏人猛士歌
風長憶沛泰山封石恥言秦荒荒日月過天地鍾鼓樓
邊照幾巡其螺川早發云長江流遠夢短棹撥殘星亦
佳于一別號軫石南昌人遭亂居廣陵乙酉正月挈妻
歸里改葬其王父母及其尊人太僕卿止敬處荒谷誅
茅營窀穸畢始入城七月兵亂于一居圍城中得不死

其妻腹兒奔竄落星橋土寇發難趨豐城十月亂平復
還省城產子孫茂乙西紀事詩所謂兒今忍問桑弧事
苦月荒風聽母聲也除夕憶兒茂云失學吾誰咎長貧
汝乏師江天風浩浩母櫬草離離後移家高郵有詩云
三十六湖鉦鼓多湖中人唱打魚歌春風禾黍神農郡
夜月蠲饅城子河高郵人以鉦鼓取魚州有佳禾一名
神農郡也客死西湖周元亮刻其遺稿曰四照堂集

宋湖州詩人吳仲孚流寓嘉定作一絕云白髮傷春又
一年閒將心事卜金錢梨花落盡東風軟商略平生到
杜鵑上元孫文川咸豐乙卯避亂居上海新牖遙和其

韻云故國烽煙年復年客游銷盡賣文錢東風又老梨
花瘦愁聽催歸到杜鵑同一懷斷明末秀水姚仙期聞
鵑一絕云何事催歸鳥鉤輈喚我頻故園經戰後歸去
巷無人此與宋南渡李御史粹伯菩薩蠻詞杜鵑只管
催歸去知渠教我歸何處哀音激楚較仲孚作又深一
層矣全謝山之言曰古之志士當星移物換之際往往
棄墳墓離鄉井章皇異地以死以寄其無聊之感方其
悵悵何之魂離魄散鷓鴣之翩欲集還翔滿目皆殘山
賸水之恫謝山生當全盛之時何其善言逋臣心事也
仙期名佳詩嘗與孫豹人方爾止合刻

黃蕘圃跋金孝章詩稿云吾鄉踞湖山旁有鳳巢幽曠境也孝章先生有鳳巢一印不知卽其地否卷中有登馬叔明巢閣登巢居還宿半巢叔明招宿巢閣巢宿將曙諸詩不知卽鳳巢否抑別有巢居巢閣之名也近日吳巢松買此山招嬾雲長老居此同人賦詩紀事爲考舊聞而旁及此鳳巢圖記以見詩人棲息之地今人稱道勿衰者究不知是此山與否也孝章初名袞字九章後更名俊明號耿菴又號不寐道人以善書名尤工畫梅其自題墨梅云孤山鶴化應無迹靈谷春回亦斷香留得一枝寒影在年年憑仗領風光好錄異書不閒寒

暑有退量集其觀權詩云獨居感時變暑謝徂秋始閒
心察蘄木零落一何駛彼草間三時舜華乃夕死凌晨
照初旭容光洵鮮美姚冶姬姜姿方花猶未似灼灼誠
可憐紛紛忽已萎如彼蜉蝣翼楚楚將安恃榮衰隨旦
暮久暫豈殊理欲息莊生言彭殤齊曠視庶保松筠心
修名企君子

張瓜田書理寒石手批世說新語後云向讀漁洋山人
蘇門三賢詩其二爲理寒石序云本李姓也名鬯和西
華人恥與逆闖同姓改曰理孫徵君稱爲魯連後一人
而詩有云奉母蓬藿中又云歸潔恐辱身則其孤露自

守可知矣末云梟獍交蹄迹神州曰沈淪靈氛久上天
呼號竟無因感激變姓名下士良苦辛則誦其歷寇變
憤國難而甘節義也張偉瞻其鄉後進也所爲理君安
和傳云理安和者字賡唐生員有德子寒石之從弟也
生數歲而孤從寒石學最力寒石出爲蘇州推官監贛
州軍我兵下贛州寒石死之安和閉戶讀書不接人事
晚多與方外者游好爲養生家言弟貞和亦從寒石學
瓜田謂思考其生平而無由蓋未見此傳

孫永慶號農隱其尊人徵君鍾元同產也隨徵君隱百
泉山顏其居曰學稼或耕淇源或耕夏峰垂五十年晚

而生子曰用果旣長問叩平生所爲農隱曰汝爲他日誌狀地耶汝視吾面黧也而傳以白柰觀者笑何方恪敏爲用果題農隱小像曰遐哉徵君初音共竹林賞學稼以名居空山得閒壤

謝兼山與巢鳴盛徐枋李天植拂衣同調時稱李謝巢徐李鐵君馬大益皆有題其晦迹圖詩爲其孫皆人作禮恭親王題謝兼山衡門晦迹圖云盤桓撫孤松衡門賦歸去矯首望雲煙時人豈知處日落飛鳥歸春蔬園中露散步攜童稚逍遙脫塵污情話有親戚詩書日參互不願軒冕榮詎受風濤懼我今聆清風頗悉畫中趣

何處訪荆溪門前五柳樹皆人卽香祖

雪橋詩話卷一